

清

史

稿

清史稿

列傳

列女

張廷祚妻蔡

陳時夏妻田

傅光箕妻吳

鄭哲飛妻朱

李若金女

王師課妻朱

秦甲祐妻劉

艾懷元妻姜

周子寬妻黃

李有成妻王

楊方勸妻劉

鄭近西書札

胡源渤妻董

林國奎妻鄭

陳仁道妻龐

張某妻秦

李氏女

何某妻韓

張
張
張
張
張
張

沈學顏妻尤

王賜紱妻時

王某妻張

學子書曰
妻珍
高妻
親
半學詩
寶精

高明妻劉

鄧汝明妻劉

魏國棟妻龐

呂才智妻王

許
原爾
某位
費長
馬路

張揚名妻彭

沈萬裕妻王

盧廷華妻沈

李豁然妻楊

曾經佑妻林

梁曩妻李

姜吉生妻木

曹某妻王

潘思周妻傅

倪存談妻方朱

楊震甲妻楊

楊三妻牛馬

陳大成妻林

溫得珠妻李

賈國林妻韓

孫雲嶽妻白

圖幹恰納妻王依氏

吳先博曾氏

王元龍妻李

蔡庚妻吳

韓某妻馬

李鳴鑾妻黃

金全所著後

徐嘉賢妻劉

冒樹楷妻周

曾廣屋妻劉

馮丙煥妻俞

袁積懋妻左

金子辰學堂邑黃博曾

周懷伯妻邊

吉山妻瓜爾佳氏

湯某妻錢

戚成勳妻廖

曾惟庸妻譚

謝萬程妻李

李殿機妻王

長清婦

程允元妻劉

楊某妻樊

劉柱元妻

李國郎妻蘇

趙惟石妻張

鍾某聘妻吳

岳氏

姚氏

張氏

袁氏

楊某妻張

周士英聘妻吳

閻壯聘妻宋

沈煜聘妻陳

王國隆聘妻余

于天祥聘妻王

方禮秘聘妻范

姚世治聘妻陳

何秉儀聘妻劉

沈之鑫聘妻唐

貝勒弘敏聘妻富察氏

灘上女子

吳某聘妻林

雷廷外聘妻侯

程樹聘妻宋

王張某 毛聘 忠買 曾長 聘 妻張某 聘 妻

李家勳聘妻楊

李家駒聘妻朱

聘買 實收 盧意

袁進舉聘妻某

李應宗聘妻李

何其仁聘妻李

聘王 聘 妻 李 店

節義縣主

李承宗聘妻何

吳某聘妻朱

徐文經聘妻姚

李煜聘妻蕭

劉戊兒聘妻王

朱某聘妻李

武稔聘妻李

陳霞兒聘妻錢

汪榮泰聘妻唐

季斌敏聘妻蘭

董福慶聘妻馮

喬湧濤聘妻方

張氏女

粉姐

關氏女

趙氏婢

張延祚妻蔡潭浦人國初師既下福建濱海數百里猶羣起負固有方祜者謀舉兵延祚與語不合被殺子才十餘歲蔡哀慟謀復讐一日聞祜將其徒至方夕易男子服挾刃詣祜坐未至顧見其子踉蹌來念母子併命斬張氏祀乃與俱歸既祜降爲民娶於蔡其婦蔡大母行也因得常見祜祜甘語謝蔡蔡益憤夜輒握刃刺壁壁穿刃猶擊順治五年春蔡伺祜有所過度道所必經將其子止松林中挾刃俟日午祜雄服怒馬來蔡自林中出叱祜祜驚呼從者從者駭走蔡持刀斫祜祜墜馬負創走蔡疾追之行人聚而譁蔡且奔且言曰吾夫爲此賊害有助者吾與俱死追及祜祜攀松枝與門中蔡額血被面門益力遂迫祜左手摔祜右手奮刃斷其首擲道旁觀者皆大驚蔡持祜首告於延祚墓將其子詣巡按御史臺門請死巡按御史霍達異其事問有主者乎蔡哭對曰夫死所以不即死者以有子耳今子且不顧安肯受他人指耶然殺人當死公母撓國法達乃釋不問

陳時夏妻田長樂人時夏父超鵬早卒母高守節田讀書知大義時夏貧事王

姑及姑高朝夕扶持不去左右病不能食輒以口哺時夏卒督諸子讀嘗自述與夫論學語爲敬和堂筆訓以授諸子粹然儒家言其自序略曰余苟延性命祇以三子一女冀其能自立不至辱泉下耳大兒今十一猶有童心況諸幼孤未亡人心力垂盡恐日暮死而夫子之學行與余之出肝膽忍艱苦以冀其有成者將誰爲余告之耶爰述先訓書之於冊嗟乎小子異日讀此其能自省使余生不負於子女死不媿於夫子否耶居十餘年卒

傅光箕妻吳宣城人吳歸於傅光箕已病矣逾年卒吳父母欲嫁之吳歸留吳而訟傅氏衣食吳吳還傅氏以訟故勿納吳復歸請自食無累父母力紡聞有媒至輒求死乃別居明季饑恒餓鄰饋之勿受族姊歸於魏亦嫠也遺之米乃半易糠粃或怪問之曰雜糜之可一月不死也久之紡有餘錢得婢曰春蘭拾簞供饔事里媼或呼春蘭食吳必審所自戒勿輕受食春蘭自是即不受里媼食

鄭哲飛妻朱哲飛南安人朱明魯王以海女也嫁哲飛生丈夫子一女子子三

而哲飛卒會以海亦列渡海至臺灣依明宗室甯靖王術桂以居康熙二十二年師克臺灣術桂自殺朱奉姑有諸孤以女紅自給居五十餘年乃卒年八十餘初師下舟山以海妃陳入井死以海諡之曰貞而以海女又以節終李若金女名閨餘干人明季宇淮王世子由桂入國初由桂出亡閨誓不更字嘗咏金環曰紅爐經百練不失本來真事父母孝年五十九卒

王師課妻朱蕭山人師課明天啟中官太醫院院判卒明亡兵亂朱率二子避九里坳嘗遇賊脅以刃朱奪刃斃而哭且誓賊欲殺之二子號慟求代得不死事平歸老於家嘗爲勗子歌五章其三章曰我生之後逢世亂白頭兵起蒼黃竄膚血染點叢麻紅母子支離宵不旦飛蟲雷衆驚鼓聲秋雨淋漓斷薪爨嗚呼九里坳邊眞瓦全爾曹性命天所憐五章曰庭闈肅潔辭親族薄田聊許資簞粥震盪扁舟波復風兒才卻聘家回祿此身直緣正氣生機杼猶能活楊腹嗚呼但願長作太平民何嘗俯仰慙天人

秦甲祐妻劉三原人甲祐病瘵劉侍疾甚謹究家政甚飭越十年甲祐卒時歲

饑兵未定劉撫二子四符四探嘗訓之曰年荒衆人之荒學荒則吾兒之荒也兵亂衆人之亂心亂則吾一家之亂也聞者以爲名言四符甲祐前婦子也劉愛之均於所生

艾懷元妻姜米脂人懷元父穆兄懷英在明皆官參將穆卒國初懷英降入鎮藍旗授牛象章京居京師順治八年懷元往省其兄既歸仇家誣爲逃人遂亡命官收其孥穆妻馬老矣妾金請代姜方娠皆就逮明年事雪西還姜襁稚子金與相扶持行數千里又明年馬與金皆卒懷元遣信至言母死不得奔喪誓畢生不歸姜食貧撫子居四十餘年乃卒

周子寬妻黃順德倫敦村人子寬刺船與其侶戲侶溺坐滅死成貴定黃求從夫行譚縣門吏爲注官書乃盡鬻嫁時物畀舅姑製竹擔荷具從夫行夫道病黃行經村市操土音歌求錢得藥物酒食奉夫夫瘞達戍所居十七年舉一子二女而夫死黃求以夫骨歸跪縣門搏額二十餘日吏許之畀以牒黃懷牒裹夫骨篋負小兒女獨身以行其長女已嫁農家子牽衣泣黃斥不顧黔多虎而

黃負夫骨逆旅禁不納日汲於澗拾樹枝以爨夜宿道旁廢廟恒見虎殘人餘
骸狼籍無所怖及至村黃齒既長鰲黑醜惡又雜羅施語有叟獨識之指道旁
冢曰此而翁也而姑僵牆陰不食已一日黃求得姑姑兩目眊黃引其手拊裹
中骨及篋中兒女姑抱而啞黃大號篋中兒女亦號鄉里皆走視義之界以金
僦屋奉姑居黃行逮歸十九年順德人號曰女蘇武

李有成妻王常寧人寡悉散奩飾於族隣貧者將卒呼諸婦曰吾寡居四十餘
年耳目如聾瞶未嘗妄視聽汝曹其識之

楊芳助妻劉宣城人嫁五日而寡剪髮自誓隣婦或微諷劉出刀以示曰吾畫
以是爲鏡夜以是爲枕隣婦慙不敢復言鄉近泗妻邢昆明人寡而貧或諷之
嫁邢曰吾能忍饑寒不能忍恥卒以節終

胡源渤妻董臨清人源渤卒胡年十五爲媵八十年年九十五乃卒里婦或問
守節易乎曰易如無夫何曰如未嫁如無子何曰如有子而死若不孝曰何以
制此心曰饑而食倦而寢不饑不倦必有事焉母坐而嬉吾嘗爲人傭治女紅

必求其工求工則心專心專則力勤力勤則勞而易倦倦即寢寤即興母使一息閒久之則習慣矣

林國奎妻鄭閩人國奎卒有子二鄭將殉姑誠以存孤乃已一子殤遂自沈於江漁者拯以還姑疾刲肝雜糜進疾良已族有亡賴子嘗中夜至告族人杖於宗祠亡賴子爲嫂書汙鄭鄭悲取刀斷左耳訟於縣縣笞亡賴子亡賴子出益妄語鄭復割右耳巡撫下永譽聞其事坐轅門譴其獄令隸以兩耳示觀者械亡賴子至閱嫂書一行輒撻其面復重榜荷校論戍邊居數月鄭兩耳復生永譽復坐轅門召而察之左耳完且皙右耳赤如血下廓乃微頰而短於左文武吏及諸觀者皆驚歎一時稱異事云

陳仁道妻龐博白人康熙十九年吳三桂將程可任掠博白仁道將與鄰人拒之爲所殺龐自經家人救之甦乃斥產購得殺仁道者殺諸仁道墓前

張某妻秦三原人康熙三十一年仍歲大禡縣民多流亡秦內外無所依至龍橋河北河岸圻有隙自匿其中有老人閔之遺以食明日復往則昨所遺故在

勸之食且問故秦曰謝翁厚然不可爲常先後等死耳我坐岸隙令死不至暴露足矣遂餓而死年二十餘老人爲封焉同時李氏女從父母逐食至漢口父母皆疫死女年十六美僧聘焉將鬻使爲妓女得其情力求死三原人賈漢口者羣詰僧僧陰殺之

何某妻韓張榮妻吳張萬寶妻李皆濰縣人韓早寡求疏屬子爲後康熙四十四年濰大饑韓晝抱子拾薪夜則紡績日一食久之有所蓄非甚飢則不食卒買宅娶婦生孫年七十三卒吳嫁三日夫死貧甚轉役自活夜必歸其室得米雜糠粃樹葉爲食羸一日食則一日閉戶年九十二病將死呼其姪謂曰我有銀紬衣帶猶昔吾夫物我死以此市棺埋我夫墓側李嫁生子方晬而喪夫舅姑謂曰汝不幸我曹老子幼汝當如何李泣曰婦非爲舅姑老子幼夫死何所不得猶忍活至此婦自審已決願舅姑無疑舅賣漿暮出戶聞鐸聲必趨往代其擔抱子力作人未嘗見其敝齒既喪舅姑娶婦生孫乃卒疾革謂其子曰我死得見汝父我甚喜汝勿悲也韓居縣東南草廟村吳居縣西張家村李居縣

北長曠村

沈學顏妻尤仁和人學顏卒無子以從子時吉爲後時吉生子大震又卒尤撫孤係其兄侮之秋將穫以衆刈其禾尤置鉞於髻末外向踊而號兄提其髮鉞創手乃去常恨其孫弱曰我安得見曾孫見曾孫死不恨大震娶婦舉子王乃卒既卒大震復舉子近思自有傳

王賜紱妻時黃平人賜紱出行宿於翁內爲苗所殺棄尸箬中時行求得之告官得苗五俱伏罪時年二十一母欲令更嫁剪髮烙左頰毀容矢不行

王某妻張溧州人早寡無子以族子曰琦後亦早卒妻魏亦州人所居村曰柳河地卑濕食不足掇草根木葉拾蘋藻雜糠粃以食其孤復殤復以族子後張卒族人諷魏嫁魏不可居十餘年爲所後子娶婦乃語所親曰吾乃今志始遂使嫁不過溫飽死耳人恒苦貧吾獨不自覺苦皆自樂生吾生不知爲樂又焉知有苦州又有李學詩妻趙學書妻高娣姒以節著學詩學書生友愛行涉水學書誤就深學詩拯之相抱持俱死趙生二女高無出食貧堅守年皆逾八十

高明妻劉秦安人早寡子步雲幼貧甚嘗伺鄰家炊之餘熱爲兒煨餅步雲稍長就學歸則然燈讀劉縫紉夜必盡數線一夕線未盡步雲倦臥撫之有淚迹問曰兒病耶曰無之但饑耳劉泣然曰兒不慣餓我則常耳步雲爲買家漸起鄧汝明妻劉崇善人康熙四十一年歲大無官煮粥食饑民劉不食五日鄰家招偕赴劉恥之三出三反終不行因投水漁人拯之坐岸側漁人去復入水死魏國棟妻龐懿縣龐家莊人祖姑徐姑董皆節婦國棟卒無子龐力女紅以養織日一疋或授以繒織成必增重曰糧所滋也或與值多一錢不受祖姑八十餘目昏向曝如廁躬負以出入姑亦至八十負出入如之再居喪有周之者魏曰吾貧幸相貸然必償如不使我償是視我非人也日夜織不期月皆償當葬衰而前樞或請代魏曰我祖姑我姑無子孫我在即其子孫也可代乎姑葬以夏方雨魏涉潦號踊見者皆流涕雍正三年縣大水歲無有縣治賑役自戶外呼告之魏曰婦固饑然食朝廷米償否曰賑也何償魏曰償則食不償則我孱婦何功報朝廷而徒食乎不可遂鍵戶復呼之不應縣使役具刺歸之米一石

魏復辭役曰此喬令君所以旌節義母辭乃拜而受縣上其事得旌族人爲立後

呂才智妻王博興人才智病僂僕杖而行鬻餅於市歲稔才智將歸王王曰汝病廢我去汝不得生且我身值幾何汝不過得數日飽食盡終當死等死不如相依死也乃令才智守舍而出行乞生一子才智死終不嫁許爾臣妻駱肅甯人家奇貧爾臣及其父母相繼卒駱號於市得柳棺瘞焉或勸盍嫁駱曰乞食雖辱猶勝於再嫁卒以窮餓死原某妻馬河津人康熙六十年饑行乞食泣語人曰乞食至辱不如死顧安得死所無累人耶或漫應曰去此十餘里有紅石崖死此可無累馬明日徑至其所脫耳環易餅運隣人過者屬以畀其母曰爲我語母無復望我我今死此矣即投崖下死

張揚名妻彭臨江人早寡貧或謂行乞可得食彭唾之曰我亦書生婦有餓死張氏舍耳安能爲丐日夜操作立後娶婦持門戶

沈萬裕妻王浙江山陰人萬裕早失母王事後姑謹萬裕卒子幼後姑虐使之

舅予田數畝使別居後姑使嫁王不可後姑陰取犬子胞擲王室陽出之曰寡婦室何乃有此迫嫁益厲或語王當以死自明王曰吾當死吾死孤不得生夫且無祀事終當白吾死又誰吾明也藏其胞事後姑愈謹後姑有少子訟於縣知縣姚仁昌察胞非人杖少子而表王節其後少子死王收其孤爲娶婦盧廷華妻沈永定人廷華好狹邪游惰沈異居姑溺愛亦惡沈沈晨必謁姑爲理井曰或私具甘旨姑不善也施鞭撻無懟廷華得惡疾沈乃歸侍廷華死以節終

李豁然妻楊永年人康熙十五年豁然卒楊年二十一事舅姑孝撫子尊賢妾婦王生子而尊賢卒姑婦共撫孤孫至成立楊以乾隆四十二年卒壽百二十守節百有一年王前一年卒年亦九十八

曾經佑妻林惠安人早寡所居濱海爲漁家補網夜無燈隨月升落爲作輟積數十年目因以盲而手甚習操作如故舅姑資以老復爲夫立後

梁妻李臨汾人曇卒時子生方兩月貧啖野菜以活曇嘗蒔槐於庭李日紡

其下護之甚謹曰此吾夫手植見之如見吾夫矣鄉人因稱節婦槐

姜吉生妻木東川人雍正八年東川屬夷叛從吉生逃山中賊至殺吉生及其子木忍哭伏林間師至賊降木躍賊至城西手搏殺吉生賊以告官請得手刃之提督張耀愍而許焉遂磔賊以祭吉生

曹某妻王興縣人早寡子暗鄰婦亦早寡相與約不嫁居十五年王詣其戚或自外至曰鄰婦嫁矣王曰信有之乎曰信我所目見也王乃大慟曰不意此婦乃有此事遂絕

潘思周妻傅名五芳會稽人思周父爲田州吏目傅氏亦僑居廣西嫁年餘生一女思周卒或欲聘焉傅截髮矢曰所不終於潘者如此髮未幾母與兄死兄公及姊又死舅亦死傅持六喪還出郭門身衰經徒步號泣以從殯民皆感歎稱孝婦歸營葬撫叔及其女畢婚嫁

倪存謨二妾方朱富順人存謨爲英山知縣坐事成伊犁方朱皆從存謨死方朱慟不食伊犁將軍爲徵賻俾持喪歸至富順嫡子出郭迎方朱相謂曰我二

人不死者懼主人骨不歸今歸矣請死相携躍入江救不死嫡子及孫死撫曾孫二成立

楊震甲妻楊楊三德妻馬張壺裝妻牛皆秦州人夫皆出客游久不歸皆善事嫡姑馬姑尤嚴日被箠楚奉之愈謹楊撫子女成立馬牛皆無子立後州人爲之語曰馬牛羊立人綱夫遠客姑在堂胸中冰頭上霜蓋借羊目楊也

陳大成妻林連江人大成坐事成黑龍江將行遣林別嫁林不可從大成戍所居二十八年大成死林裹其骨襁兒女乞食跣行萬餘里還故鄉灌園自給葬大成祖墓側

溫得珠妻李永清人得珠早喪母父娶後妻生二子遂惡得珠並憎李得珠病狂易一日逃其叔杖投井死父母聞不哭李力請乃得斂遺腹生子經元舅姑迫李嫁謂李嫁則田廬皆二少子產也因虐之百端李度終不可留抱經元辭舅姑還母家賃地以耕勞苦自食力經元娶婦生孫而舅及二少子皆死遺田亦殆盡姑衰病無所依李乃率子婦遷起居牀下姑執手流涕道其悔也而得

珠叔故助虐者亦前死其嫠仰食於經元經元有四子皆力田能孝養

賈國林妻韓國林扶溝人韓准寧人乾隆五十一年大饑民爲盜國林有族子二行無賴執國林及韓紡於庭之槐而盡取其室所有已乃斫紡釋之國林將指傷越三日死韓欲告官無人焉爲之佐有子二皆幼其弟日負薪米贍姊夜執梃伺門戶居數年無賴又至徹其屋茅激大甌中韓手遂奪田伐樹一不與校二人者死乃稍稍得安嘉慶二十三年又大饑無賴有子鬻其嫂夜出走韓爲召其夫歸之因泣告其子曰害爾父者某也今其子又鬻嫂不仁哉此父子也顧爲賈氏婦即餓死豈可失清白汝曹當死守之此婦竟得免

孫雲獮妻白興縣人生十四年而嫁嫁十三年而雲獮卒又二十年子長娶婦白挈以拜雲獮墓指而言曰此君子也此君婦也吾事畢可以從君矣慟而仆遂絕

圖幹恰納妻王依氏滿洲人乍浦駐防圖幹恰納瓜爾佳氏早喪母尋亦卒無子嗣絕矣父查郎阿謀爲立後王依氏曰子他人子終非骨肉不足奉大宗願

翁娶繼室查郎阿威其意娶於邵生子觀成觀成生七月而查郎阿卒王依氏哀姑少寡奉養甚謹躬操作助姑撫孤既遭疾猶不自逸事輒代其姑卒時觀成已舉鄉試以子鳳瑞爲兄嗣未百年而子孫繁衍至百餘人吳先榜妻鄭陝西山陽人先榜卒鄭誓殉家人慰喻之曰兩兄公皆無子若方有身男也吳氏幸有後逾數月生男撫以成立吳氏得有後

王元龍妻李嘉興人元龍悍嗜酒稍拂意輒呵斥既傷於酒而病李斥嫁時所媵田供藥餌元龍病益悍稍間則日夜博怒李故以非禮虐使或加以鞭楚李安之無幾微忤也元龍病三年而死李朝夕上食輒號慟服除會兄公之官福建姑老不能赴李往奉姑七年而姑卒李泣謂諸從子曰我當從汝叔於地下矣會火發李整衣坐樓上有梯而援者李戒母上樓燼死焉

蔡庚妻吳合肥人早寡立從子爲後以事姑嘗爲辭自序曰父母生我時惟願得其所十六歸君子同心祀先祖歸時舅已沒姑老誰爲主嗟嗟夫質弱終朝抱疾處十八幸生男朝夕姑欣觀無端因痘殤姑泣淚如雨堂上節姑哀入幔

痛肝腸二十再生男視若擎天柱兒生甫一載忽然夫命殂姑婦并時啼眷屬
羣相撫死者不復生弱息堪承父那知天奪兒骨肉又歸土姑祇有哭時我豈
無死所還念朽姑存我死誰爲哺隱痛斂深閨衰顏願長護奇災偏遇火焦爛
姑肌膚和血以丸藥年餘乃如故災退宜多壽云何復病殂送姑歸黃泉夫闕
我今補我今補夫闕一死何所顧哀哀我父母惻惻將泣訴卒年八十有八
韓某妻馬萊蕪人貧夫商於遼陽馬出爲傭聞夫死其父欲嫁之馬曰歸夫骨
其可乃乞食行五千里得夫骨負以歸日行一二十里夜或露宿犯風雪行歲
餘乃至家既葬其父終欲嫁之馬執白刃自誓乃已

李鳴鑾妻黃騰越人咸豐間雲南回亂鳴鑾以千總戰負傷卒黃截髮撫二子
同治初寇至轉徙爲人縫紉浣濯日率一粥仍督子讀不輟嘗曰人不讀書與
禽獸何異金光炳妻倪金華人光炳卒倪殉救免洪秀全兵至携二子竄山谷
亂定力作自給貧甚督子讀不少假

徐嘉賢妻劉嘉賢天津人劉桐城人嘉賢少從軍河南嘗單騎入賊壘拔陷賊

婦女數百人出旋卒劉貧輒數日不舉火嚴督其子讀族有爲令者招使往劉曰今不自立而託於人懼吾子之不振也謝不往

冒樹楷妻周樹楷如皋人周祥符人樹楷以知縣待闕福建早卒周挈子女從舅廣州舅亦卒僑居日食率百錢翼子女以長子得官將請旌周拒之曰婦節常耳人子於其母奈何欲假以爲名哉父星詒諸父星醫星督並有文行周刻其遺著爲父營葬置墓田焉

曾廣屋妻劉衡陽人歸廣屋舅老姑前卒兄公初喪舅痛子幾失明出入需人劉侍舅謹日執炊一飯三起視舅起居衣食雖貧必具酒肉舅病奉侍七晝夜不就枕舅卒棄田廬治喪劉方產徙陋巷艱苦冰雪中廣屋又卒乃與姒李同居以子爲之後李亦苦節劉事之如姑晝治鍼箒夜則紡績節衣食命子就學卒以成立方極困老稚或乞食必分食與之晚少豐年饑必出穀以振貧者

馮丙煥妻俞丙煥大興人俞樂城人丙煥爲世父後俞事兩姑維護調和迭遭諸喪丙煥亦卒喪葬皆盡禮光緒二十六年京師被兵俞市米數十石與貧者

戚友相依者六十餘家衣食之亂定始去亂後多暴骨募資爲收斂死難者求其姓名爲請旌卹獄囚衣糧主者不能給斥銀米界之其後直隸安徽災輒募資至鉅萬京師恤餒會八旗工廠皆輸金以助其成

袁績懋妻左績懋見忠義傳左名錫璇字芙江陽湖人事親孝父病刲臂和藥進工詩善畫書法尤精著有卷施閣詩集績懋子學昌妻曾名懿字伯淵華陽人通書史善課子著有古歡室詩集醫學篇女學篇中饋錄俞振鸞妻傅振鸞餘杭人傳名宛號青泉大興人以禮女能承父學工詩著有山青雲白軒詩集教子嚴建宗祠立條教示子孫光宣間江浙遇災屢蠲金振之

周懷伯妻邊懷伯餘杭人邊諸暨人邊事姑孝懷伯卒有女子子三邊恃女紅養姑營喪葬嫁三女貸於人以舉節衣縮食數十年乃畢償年六十九知將死辭親族啟夫墓右生壙坐臥其中遂死堅屬母具棺重以累人親族哀其志櫟裡而掩之

吉山妻瓜爾佳氏名惠興滿洲人杭州駐防早寡事姑謹嘗刲肱療姑疾光緒

季年創立女學逾年資不足校將散乃飲毒具牘上將軍自陳以身殉校且言曰雁過留聲人過留名我非樂死不得已耳既死將軍瑞興與巡撫張曾敷奏聞賜貞心毅力額衆爲集資擴校以惠興名焉

張某妻錢嘉興人生一女而嫠還依父母居姑貧計需之度錢剛言無益陽攜以省戚先期告鰥婦家待郭外舟出郭別有舟來並艖則鰥婦家人也姑乃告錢錢即起躍入水鰥婦家人大驚而姑已得錢強婦往趣舟行錢屢躍入水持之不能止至三衆皆懼乃送還父母家而錢爲救者搥胸傷咯血數月卒

戚成勳妻廖江津人成勳家萬山中張獻忠之亂成勳出避寇廖弱不能從閉重門獨居家故有餘粟粟將盡就池畔種稻以食衣敝綴草自蔽居四十餘年山徑塞與世隔絕成勳竄黔中聞亂定乃還行求故山斧竹木得道見其宅盡圯隱隱起炊烟呼且入廖自樓上問誰何成勳道姓名廖乃泣曰我夫今得還耶我無衣君以餘衣畀我乃得下相見成勳解衣擲樓上廖衣以下面目黧黑髮如蓬相持大慟共居又十餘年年各至九十餘

曾惟庸妻譚衡陽人順治五年譚歸惟庸方四閱月惟庸爲游騎掠去亂定有言惟庸死者譚召族人分授以田宅康熙二年惟庸還詐稱行賈過譚音容已盡變譚不能誠求食與之求借宿不可越日再至乃自名惟庸譚未敢信問臨別時事嘗授三輪鐵奇銅偶語皆驗譚乃泣而言曰君別十六年謂物故久今幸生還當告諸宗族惟庸召族人置酒具白其事爲夫婦如初

謝萬程妻李唐縣人萬程父儀順治間諸生貧卒無棺萬程將鬻妻以爲歛不忍言李知萬程意哭請行南陽民王全以二十四金贖李歸將以爲妾李至全家日涕泣但願供織紵不肯侍全全亦聽不强居一年所全兄大有與全隙詣南汝道告全匿逃人事下南陽府同知張三異三異漢陽人嘗爲陝西延長知縣有惠政詰大有辭遁召全並以李至問何爲匿逃人全曰李妾因言妾至日涕泣但願供織紵居一年所不我從也問得自何所乃復召萬程具得實妻葬父狀三異驚歎問萬程欲復合否萬程言妻故無失德聞其至王氏日涕泣但願供織紵居一年所艱難以守身我豈不欲全而無其資則奈何三異出俸二

十四金償全而使吏以金幣送萬程夫婦還

李殿機妻王名素貞亳州人幼喪母父以字殿機殿機父範同順治初坐法妻張及殿機沒入象房殿機方三歲稍長自鬻於鎮紅旗護軍厄爾庫爲奴厄爾庫妻以婢蕭王從其父居二十餘年其父病且死以簪珥授女泣曰此李氏物也又數年或傳殿機死王氏諸父兄迫女別嫁女願爲殿機死久之詞殿機猶在欲走京師求殿機隣有范一魁者其父友也王乞爲導諸父兄不欲令處於樓去其梯王以夜縋而下從一魁至京師求諸象房有知者導至厄爾庫家殿機荷舂拾馬通自廐出一魁前與語王出父故所授簪珥相向哭行路聚觀皆流涕厄爾庫義之許放殿機及蕭不督自鬻值巡視南城御史阿爾賽疏聞下禮部禮部議八旗家奴不得復爲民惟王氏守節求夫裨風化應如所題康熙二十八年四月乙未疏上聖祖可其議王年已三十有四猶處女也

長清婦王氏父王三農也未行歲稔父母舅姑議鬻之而均其直販挾以去至饒陽入妓家矢死不肯汙轉至孔店村村諸生孔繼禹繼淳兄弟好義愍其志

以五十金贖焉問所居地曰焦家臺問戚屬以父王三對當春村民祠泰山具榜書女始末畀行者誠使入長清界則揭榜焦家臺農有見者以告王三詣孔氏以女歸復歸所字壻

程允元妻劉名秀石允元江南山陽人秀石平谷人也秀石父登庸康熙間爲山西蒲州知府初謁選允元父舉人光奎亦在京師相與友申之以昏姻時允元二歲秀石生未朞也光奎歸尋卒乾隆初登庸罷官居天津北倉亦卒秀石年二十二母前卒諸兄奔走衣食弟崇善爲童子師徙廢宅姊妹姑姪猶五六人食不得飽寒無衣相倚坐取暖崇善死益貧恒數日不得食屋破羣僮坐雨中乃徙依比邱尼照震無何家人相繼死惟秀石存力鍼繡自活照震徙天津秀石從嘗有求昏者介照震道意秀石恚不食照震力謝乃已允元既喪父亦中落聞登庸卒家且散顧不知女存亡或傳女死勸別娶允元不可且曰女即死必醢其墓乃別娶乾隆四十二年附運漕舟至北倉求劉氏有舟人爲言劉氏家已散其孥殆盡死惟第四女存是嘗字淮安程氏傳程氏子已死而女矢

不他適昔居準提菴今徙天津不知菴何名也允元因言已即程氏子舟人又言劉氏有故僕瘡而義歲時必問女起居允元求得僕偕詣照震言始末照震疑且憚秀石未敢以通允元言於監漕吏牒天津縣知縣金之忠召允元問之信使告女且勉之嫁女猶辭復使謂曰女不字五十七年豈非爲程郎程郎至天也復何辭乃成昏大學士兩江總督高晉以其事上聞下禮部禮部議義夫貞婦例得旌表至幼年聘定彼此隔絕經數十年之久守義懷貞各矢前盟卒償所願實從來所未有應旌表以獎節義上從之

楊某妻樊字正撫寧人既字而楊氏子病且廢使辭於樊樊母乃爲正改字行有日正請於母曰兒奚嫁母曰嫁某氏正曰兒幼非受楊氏聘乎母曰然楊氏子病且廢使辭於我我憐兒故爲兒改字也正不語夜潛出度山林數十里晨至楊氏翁姑未即許父母亦至相與慰勉正曰夫病天也我爲病夫婦亦天也違天不祥欲別嫁我請死乃卒歸於楊楊氏子病良已同縣又有劉柱兒妻魯字春柱兒先爲李氏義子聘於魯既復還劉氏李富而劉貧於是李氏之人嗾

魯使能婚劉不敢爭也春聞亡之劉氏魯氏刲春歸訟於縣縣判歸劉氏時乾隆十九年先樊氏女事一歲

李國郎妻蘇南安人未行父以國郎貧爲女別字富家子樊李氏書幣蘇繼未絕父招富家子贅於家以死拒撻之不悔富家子自去國郎聞訟於官乃歸於李昏夕泣曰吾父以吾故在繫何得遽言昏國郎爲請於有司出其父同縣蔡登龍妻林其父母亦以壻貧欲別字不從令別居積女紅得十五金使以遺登龍佐聘錢父母少之乃日減餐治女紅益勤逾年又得十餘金卒歸登龍父母既喪孤弟貧無依乃收撫之又有黃元河妻戴吳恒妻陳壻皆有廢疾父母識毀盟力請行戴勤儉起其家吳以節終

趙維石妻張小字瑤娃甯羗人年十七未行嘉慶初教匪掠州賊渠得之以畀其妻其妻以瑤娃慧畜爲女渠累欲汙之賴其妻以免尋竄徽縣一夕渠醉召瑤娃瑤娃拒之力渠使其下將出殺之其妻知不可救戒勿過創棄諸野而以死告次日賊引去村婦昇之歸藥其創良愈將以爲子婦會縣吏過門瑤娃拔

銀釵賄吏使告縣瑤娃至縣庭陳始末乃召維石爲合昏與俱歸

鍾某聘妻吳武岡人待年於鍾氏鍾氏子從父買四川久不歸或傳已死鍾母卒吳紡績奉其祖母祖母卒爲營喪葬年四十餘鍾氏子始歸欲與昏吳曰君出游久安用就木老處子爲出資爲買妾而自居別室鍾氏子以不婦訟於官吳曰若祖母吾奉之若妾吾畜之吾齒長不能育子女請以貞終官判從之

岳氏安平人嫁可仁言病癰仁言以禮去惡疾遂大歸居數年病已而仁言已別娶或譏其嫁岳不應以鍼綫遍綴衣履投井死仁言聞乞李堪銘其墓姚氏通州人嫁同州張維垣維垣移家湖北歸旣娶復去逾年遺書絕姚令改嫁姚持書泣告鄉黨曰我無故見絕死無以自白願終守以明志居五十餘年乃卒張氏之族高其義持喪葬張氏兆爲立後

張氏江南華亭人字金景山年十二喪父母待年於姑氏張莊而無容景山憎焉稍長當昏景山故遲之旣而病作張奉湯藥斥不使近輒泣而退景山將死指而語母曰彼非吾偶兒死必嫁之景山死張矢不嫁或以夫不見答勸曰我

知夫死婦節而已不知其他且祖姑及姑誰爲養者若必強我我請死是歲姑卒越八年祖姑卒張爲營葬日夕紡績足不踰閭又三十餘年乃卒

袁氏名機字素文仁和人兄枚見文苑傳機幼字如皋高氏子高氏子長而有惡疾其父請離昏機曰女從一者也疾我侍之死我守之卒歸於高高氏子躁戾佻蕩游狹邪傾其奩具不足扶之且灼以火姑救則毆母折齒旣欲鬻機以償博負乃大歸齋素奉母高氏子死哭之慟越一年卒

楊某妻張名荷甯國人某貧無行令張以非義不應樓居潛去牀前板給使墮折足匍匐歸母家某鬻子張積金贖之將卒命子以喪歸楊氏

周士英聘妻張泰州人士英喪父母叔狡利其有錐殺之時順治九年張年十九未行聞其事哭不食遂自髡爲尼具牘丐母舅偕訴有司巡按爲上其事誅殺人賊張乃理士英家財葬士英及其祖若父爲廬奉佛祀周氏三世張旣爲尼名曰明貞表其志也

蘭壯聘妻宋名典蔚州人典家西崖頭壯居千字村皆農家也以羅帕爲聘壯

死典方從母春穀聞輟春慟不食父母喻之意若稍解者數日以羅帕自經死時康熙四年正月庚辰

沈煜聘妻陳名三淑錢塘人幼能詩康熙間訛言官中閱選民間女子倉卒嫁娶殆盡三淑父以許煜煜故貧客松江久不歸三淑父從軍雲南戰死其母欲改字富人子揚言煜已他娶以絕三淑意三淑聞慟哭自髡其髮矢不字遂病時時哭極悲鄰生有聞而哀之者求煜告以故煜請婚母持不可二十二年春二月三淑病篤其母以媒言召煜煜至使入省三淑三淑方寤告以沈郎至遽寤手下帷自蔽煜問可有言乎三淑徐曰既有成言何爲又他娶煜辨其誣三淑都無言惟以袂掩淚煜辭出三淑泣不已已而歎曰彼不負我我死可遂不飲藥越日卒

王國隆聘妻余懷遠人國隆游不歸或言在含山余父母挈余行求不遇遂僑居焉余母死從父灌園紡績自活恒以巾幘首隣女罕見其面康熙二十八年父死歛畢女自經韋思誠聘妻宜廣德人思誠遠行母以貧欲令改字宜不可

遂歸夫家慮有強暴竊伺夜懸柝於牀微風柝有聲以警一夕語諸姑姊夢夫告以死遂哀泣不食死

于天祥聘妻王名秀女祥符人天祥嘗育於陽武王氏爲娶妻生子妻死還于氏繼室以王王未行而天祥死王父母祕不使知久之始聞力請奔喪天祥喪已小祥矣王請於陽武王氏願得子天祥前室子王氏靳不許及大祥具奠卽夕自經于氏故有刈麥刀二俄失其一至是得諸王枕下

方禮祕聘妻范名二妹建水人幼事父可望孝字禮祕未行禮祕父良佐死妻改嫁蕭仲居方氏禮祕及其兄妹皆死范聞哭之慟請於父母歸方氏居久之聞姑詬仲始知禮祕非良死以質姑姑內慚不復言范度事無證禮祕冤不得白恒時時號痛仲憚范欲以妻其從子百方強之范不許仲怒揮范仆手點額范怒曰奴汗我額刀剗伸手所點處血淋漓被面其弟訟諸吏吏笞仲以其室屬范使奉方氏祀

姚世治聘妻陳會稽人兩家皆居京師既定約世治歸陳父欲別嫁陳易服行

求世治遇諸濟寧曰女違父非孝得見君子事畢矣遂入水死

何秉儀聘妻劉昆明人農家女也秉儀卒女請於父母欲奔喪不許乃竊出兄追及之度金汁河將赴水兄力持曳以歸秉儀父使迎女女哀慟泣血日夕力作父母畀田四畝女爲夫弟昏鬻牛喪舅又鬻牛父母怒使告姑誣女有所私當遣之嫁姑以責女女不能自白心疾作縊死

沈之螽聘妻唐之螽普安人唐武進人之螽父文郁唐父元聲康熙季年同游高州相友善約爲婚姻於是唐生三年矣元聲卒喪歸文郁亦還普安普安去武進且萬里而文郁貧虛不能爲之螽娶詭言之螽殤使謝唐唐矢死久之文郁將如京師求官迂道至常州唐出拜涕泣慷慨陳所志文郁心悔則請爲養女期得官迂以歸旣文郁以病還唐聞大慟遂不食七日竟死後三十餘年之螽以事過常州始聞唐死狀感痛求其墓已火葬矣唐死時年十六

貝勒弘噉聘妻富察氏弘噉怡親王允祥第三子上命指配富察氏雍正六年未昏卒富察氏聞大慟截髮詣王邸請持服王不許跪門外哭至夕王終不許

乃還其家持服越二年王薨復詣王邸請持服王邸長史奏聞上命許之諭王福晉收爲子婦令弘敷祭葬視貝勒例以從子永喜襲貝勒諭謂俾富察氏無子而有子以彰節女之厚報焉

灘上女子不知其氏雍正間灘田家女也未行而夫死其母往弔女請從母止之不可衣紅而襲以素灘俗婦弔喪不至殯女陽爲如廁因問得殯室潛入去襲縊柩側

吳某聘妻林漳浦人未行夫坐罪當死林欲入獄與訣夫丐獄卒勿納林晝夜哭不食夫使畀以錢三百且曰速擇佳婿毋自苦越日聞夫已決以所畀錢易緡縊

雷廷外聘妻侯南安人廷外母黃早寡貧虛不能娶乞貧家女撫之期長以爲婦故侯四歲而育於黃十一黃卒十六廷外卒死而不瞑侯慟屢絕廷外有從兄以其子震爲後侯乃笄抱以拜祖侯母欲令別嫁拒以死身自耕跪而耕十指皆胼嘗誠震曰婦人不可受人憐况孀乎震亦早卒其妻傅從姑織席以育

子

程樹聘妻宋名景衛長洲人樹十三補諸生喪母復喪大父旋亦卒景衛年二十請於父歸程以素服拜舅見於廟謁其大父喪成孫婦服謁其母喪成婦服乃哭其夫持服三年終復補行姑服三年同縣陳氏女淑容未行而壻殤有請昏者遂自經景衛爲作詩於詩共姜用劉向說於春秋伯姬用何休說旁採朱彝尊汪琬彭定求諸家言申女子子未嫁守貞之義貫穿賅洽八百餘言以破俗說白己志景衛通經義好讀先儒論學書娣姒皆從講說病女教不明乃會通古訓括聖賢修身盡倫之要復作詩九百餘言授娣姒令歌習之張氏子聘姜姜名桂元和人年十九壻與舅姑先後卒依其母以居不嫁錢氏子聘妻王吳人亦年十九而壻卒女絕食大父母強起之居三年有請昏者復絕食死復蘇母哭之女曰先年兒私吞金環不死食銀硃又不死頃復吞金環兒死願得葬錢氏之兆遂卒王志曾聘妻張亦吳人年二十志曾卒居六年聞姑喪因歸於王奉佛以終三女皆與景衛同時而桂能詩善畫嘗爲柏舟圖賦詩贈景衛

景衛有二婢曰衛喜字於張張死不更字曰陳壽嫁朱氏寡無子皆依景衛以老

李家勳聘妻楊海甯人楊富而李貧家勳父爲楊氏佃楊父行田見家勳慧問之九歲使入所立塾資令讀年十五入學爲諸生家勳父來謝楊年十四呼令出拜楊母及兄皆悲曰是老顛豈思女無家而棄諸佃人子乎父旋卒楊氏之人薄家勳一夕呼燈無應者楊自帷言曰丈夫不自處高明何依人受慢爲家勳遂辭楊氏去乾隆十五年舉浙江鄉試楊氏請昏家勳以試禮部辭留京師數年病卒楊知母將爲議婚他氏請於母願得迎家勳喪臨窆然後聽母母許之楊迎喪於郊奠竟要母遂歸李氏家勳父老而瞽楊請於姑爲買妾生子家勳父八十日復明德楊甚命其子呼嫂母也楊或曰徐氏

李家駒聘妻朱高安人大學士軾女家駒乾隆三十六年舉人早卒朱事父母孝性和以肅自諸弟妹及內外戚獲咸敬憚之生惡華綵寸金尺帛不以加身及聞家駒計欲奔喪飲泣不食時軾督學陝西大母喻其意誠當待父命始復

食軾還越半載乃以請遂歸於李事祖姑及姑如事父母軾有父喪聖祖命奪情視事疏請終喪戚友或尼之朱泣曰吾父不得歸雖官相國年上壽猶無與也彼姑息之愛何爲者聖主當鑒吾父之誠矣卒得請鄰火且及朱坐室中不肯出曰死吾分也宋共姬何人哉姑破扇挾以避病不肯藥兩弟來省曰吾死無恨但恨不得終事吾父及吾舅姑又曰我生惡華綵寸金尺帛不以加身死毋負我遂卒賈汝愈聘妻盧汝愈故城人盧德州人協辦大學士蔭溥女汝愈卒盧矢不嫁賈氏迎以歸爲立後

袁進舉聘妻某天津梁進忠養女也進忠負薪行水次有大舟泊焉或抱女嬰出授進忠曰此女生八月矣父之官卒於舟母繼殞其善視之進忠撫以爲女而進忠有長女悍甚女稍長貌端好長女將鬻以爲人妾女不可長女益恚進舉故無藉長女咻父母使字焉進舉行不歸又使告其母謀罷婚女復不可進忠病瘍生於脛女刲股以療家人皆不知而長女虐愈甚進舉母憐之迎以歸進忠及其長女皆死女爲營葬迎義母進忠妻同居長女有子失所召爲鞠之

爲進舉弟娶婦生子爲進舉後終姑及其義母喪女遂自經死有司葬之天津西郭外五烈墓傍五烈墓者先爲三婦墓塋譚應宸妻陳阮某妻諸趙某妻裴陳諸皆以捍強暴死裴以節終乾隆元年金振妻丁殉夫附塋稱節烈四婦墓七年又有殷氏女誤嫁倡家爲所迫鍾楚炮烙沃以沸湯死塋墓側稱五烈墓五十六年復塋女更爲六烈墓云

李應宗聘妻李昆明人所居曰廟前鋪大河埂父春榮未行應宗卒其明年應宗大母語春榮將改字女女聞遂縊縊之夕裂綾二尺許刺血書九十四字民家女未嘗讀書字多訛易嘉興錢儀吉爲之句讀曰呈天子前曰忠孝節烈曰二月初九日二月初九日蓋女死日事在乾隆末

何其仁聘妻李路南人嘉慶十一年年十六未行其仁及其父皆病篤李割股畀叔母使送壻家至則其仁及其父皆已卒其仁母燭以奠李欲奔喪母尼之遂縊王前洛聘妻林潛山人前洛病林父餽藥林潛刲股入藥前洛卒固請奔喪引刀誓不嫁

節義縣主成郡王綿懃第七女選文緯爲壻文緯費莫氏內閣學士英綬子未
昏嘉慶十八年文緯卒主時年十六詣文緯家守節仁宗詔封節義縣主二十
二年卒

李承宗聘妻何巢縣漁家女也兩家居濱溪相違半里餘而李氏廬當上流承
宗卒女年二十請奔喪父母不許不食四日不死自經或拯之越日自沈於溪
求其尸不得後三日尸見溪上流正直李氏門江亨昭妻楊侯官人二氏皆漁
家楊未嫁與亨昭舟相值必引避或遇水次則自匿蘆葦中其母非之女曰漁
家獨不當有恥乎旣嫁強暴窺其有色潛過之楊擠使墮水亨昭死殉焉

吳某聘妻朱海鹽人吳某年十八喪父母遂出游不歸朱貧父老辟織屨其
兄悍屢辱之朱曰兄貧不能食我父我父衰無所營不得不就兄食我留乃助
兄耳及父死朱年五十八吳不知其在亡吳之族慙朱節迎以歸爲立後

徐文經聘妻姚名淑金侯官人文經卒淑金屢求死乃歸於徐貧舅沒姑疾作
刲股以療徐擲芹供姑自食其棄莖無何姑亦沒嗣子以貧去淑金目昏不能

治女紅以鉢爲釜以草爲衾僦屋不償直見逐泣路隅有負擔者憐而周之里人醵金助衣食僅得不死猶朝夕拜徐氏祐祝其嗣子歸也居十餘年乃卒

李煜聘妻蕭秀水人煜酒家子居郭南萬蝶濱蕭未行煜死蕭無母請於父願歸李翁姑道媒止之勿聽遂歸李視煜歛即奉侍姑執爨濯衣甚謹姑悍既不欲李來又見其貧也晝夜督李唯唯無一言鄰勿善也或勸姑姑亦督焉士大夫衆至誠翁虐貞女貞女光爾門宜善視之姑終不欲李同居衆乃於室後闢小樓居貞女醵金以飲之

劉戊兒聘妻王名孝武陟人未嫁歲大無戊兒行六年不歸父母欲別嫁孝間出如劉氏值老嫗問劉戊兒母嫗曰我即戊兒母也孝拜且泣曰我王氏女姑之子婦也嫗驚未信孝探懷出物示嫗曰此非姑家聘物耶吾竊持以來爲信嫗視之亦泣復以貧無食辭曰吾夙知姑貧翁沒兩叔幼安得所食我能女紅茲固爲養姑來也生未嘗一時離吾母計無所出而後來因復泣曰如不見容我無歸理惟赴水死耳嫗告孝父母許焉孝勤紡績夜磨作蒸餅使叔鬻之姑

病日夜侍居數年鄉里感其義率錢周其姑葺舊屋爲叔娶婦生子姑卒合葬於舅墓乃授家事於叔夜入室扃戶寂無聲翌晨叩戶不應毀牖入則自經死衣履皆易新製者時嘉慶九年二月乙酉孝年二十四至劉氏事姑十二年姑死乃死

朱某聘妻李字容東安人父大純幼字朱氏朱氏子遠游十餘年不歸或傳已死女既喪父母無昆弟獨與其婢春華居誓不嫁春華稍長其父謀嫁之春華義不去容亦誓不嫁其父不聽春華乃告容俱赴水死

武稔聘妻李伊陽人年十一喪母育於武從姊婦事舅姑謹姑願臥調醫藥治家事日勤姑卒撫叔弟及二女妹年十七猶未婚稔墮井死誓從井舅止之幼弟妹環而哭李大慟遂總髮爲紒曰吾當終婦事請於舅立後紡織以佐家舅娶後姑又有疾調醫藥治家事如前時久之叔弟補縣學生兩女妹皆嫁又數年爲所後子娶婦則語其兄曰妹義不即死誠不敢死也今吾家奉舅姑宗祏幸有人井中人待我久我將從之晨起從容問姑安出行汲自投稔所墮井死

道光二十一年八月壬寅稔生日也後稔死二十有一年

陳霞池聘妻錢桐城人居東鄉未行而霞池卒錢請奔喪東鄉俗以爲子死婦奔喪於家凶辭之錢毀容矢不嫁久之陳氏之族迎以歸爲立後居數十年縣有士人往存問爲言朝廷旌貞女與節烈並重當請於有司錢聞大驚蓋初不知其行應旌也

汪榮泰聘妻唐名鳳鸞榮泰歛人唐淳安人父以許榮泰未聘而父卒母更許他姓他姓來聘唐自所居樓裂所製衣履擲於庭俄蒼然躍而出遂墮地死榮泰請迎喪母不許母卒乃迎喪以歸

季斌敏聘妻閩斌敏正藍旗漢軍閩滄州人斌敏未昏卒閩年十八矢不嫁居二年聞有媒妁至截右耳逾三日又截左耳其父春以告季氏迎以歸女事姑甚孝爲夫補行喪服喪終歸訣父母謂當死從夫父母力勸喻之女復還見姑言笑如平時即夕飲毒死啓篋封所割兩耳識曰全歸

董福慶聘妻馮福慶固安駐防漢軍馮霸州人也福慶貧餓猶耕死於田女年

二十請奔喪福慶父往沮之曰子餓至死復忍餓汝家女耶女出拜伏地哭不起福慶父乃諾之遂奔喪執婦禮以終寒餒皆無愆

喬湧濤聘妻方桐城人湧濤卒湧濤母丁亦病方請於父母歸於喬以姑病寒疾亦薄其衣當風雪剗股以進姑病良已乃營葬湧濤以衣負土三日不食爲湧濤立後淡食布衣深自刻苦病將革戒子婦母以寸絲飲

張氏女名有鄒平人歲饑鬻爲高唐朱氏婢及長主母爲議昏有泣言幼已字人不敢負主母使求得所許字者則已別娶有子女矣以語有有曰雖別娶身不願更事他人主母憐而聽之有終不別字以死

粉姐失其姓高郵人父爲進氏蒼頭字某氏子歲饑某氏子行乞轉徙十餘年女父遇之江都市上某氏子曰我終不能娶還我聘錢聽別嫁女父喜還聘錢與析券歸告女女嗚咽不語夜自經

闕氏女名玉浙江仁和人玉端麗能詩文父亡與母及兄嫂居年十三福王由崧帝南京選民間女子玉母匿諸賣菜傭家玉父亡時留百金畀玉兄備玉嫁

玉兄蕩其資遂與傭謀字傭子玉在傭家尙待年號泣求還不可得疾作始遣歸玉垂絕語其母曰兒今且死願埋父棺側不作傭家鬼也復嚼齒曰兄陷我遂卒玉嘗作怨歌好事者以琴譜其聲曰闕玉操辭曰父生我兮中道逝母榮兮門衰瘁兄嫂難與居挾我如目中之塵沙伊又遣此佻巧兮胡廷我之寶多彼六禮之已愆兮曾貞女之貶從矧要予以桑中兮夫豈其爲予之匹雙我有母兮蠱思泣血我父而有知兮怒衝髮我兄摩挲傭之金兮骨肉相蔑嫂旁睨兮笑言啞啞我忽憤氣兮如雲指漆室女以爲正兮又告夫司命與湘君予不愛一死兮弗忍速阿母之下世願死而有憑兮爲凶之厲嗚呼哀哉我終死兮魂獨歸去明告我母兮幽告我父匪我夙夜兮胡然遭此行露也縱謂多行露兮寧能我之汙也重曰嘉名爲玉父之命兮幽屏冀壤終保貞兮憂思悄悄淚淫淫兮蒙恥忍詬曰當心兮

趙氏婢失其名爲杭州趙氏婢趙氏嘗有客言路珠子之學使爲婢算曰是當七易其夫婢悲曰吾嫁則有夫有夫則有死吾今且不嫁誰爲之夫者自是蓬

首垢面矢不嫁趙氏有婚嫁輒避匿媒氏至詬詈不可近主誨之搶首乞終役
年至七十餘死於趙氏

清史稿

列傳

列女三

韋守官妻梁

歸昭妻陸

明外祖堂妻張

羅仁美妻李

仁美弟妻劉妻梅李等

懷應式女

王氏三女

沈華區妻潘

陳某妻伍

伍同妻顧等

洪志達妻葉

羅章袞妻杜

章袞妻杜氏等

王磐千妻顏

阿大封妻阮

方希文妻項

廖愈達妻李

廖妻在妻張

姚文瑤妻劉

毛氏妻陳

王三接妻黃

陳氏妻郭王勝妻

程顯妻朱

元氏妻吳妻朱

應氏婦

平陽婦

殷壯猷妻李

楊昌文妻袁

譚日昇妻陳

陳某妻高

林應維妻莫

莫氏妻女吳氏妻王黃氏妻李

文秉世妻梁 文氏女 阿氏女 文繼妻 王氏三女

陳心俊妻馬 張郭凌清女 張國行妻 姑 張聯標妾傅

林乾妻程 楊應鶚妾佟

黃居中妻吳 胡守謙妻黃

沈棠妻俞 陳得林妻 蔣等 汪二蛟母徐 劉章妻 徐

黃嘉文妻蔡 徐明英妻吳

長清嶺烈婦 韓昌有妻李

馬雄鎮妻李 長鎮等 沈瑞妻鄭 傅繼妻 黃

劉岷妻張 天妻 吳及二女 姑 烏蒙女

劉亨基女

滕士學妻滿 向宗榜妻 謝作賢妻 姑 嚴家高妻 黃 高村姑

陳世章妻朱 薛中傑女 傅英妻 周

任寨村二十烈女 王自正妻馬

強逢泰妻徐

陳方玉 張覺 妻 張

寶豐二婦

戴鈞衡妻李

貴 劉

陳吉麟妻周

凌 傅 經 妻 楊

秦耀曾妻畢

曹 士 麟 妻 管

謝石全妻廖

胡 曾 石 麟 妻 廖 黃 金 題 母

石時稔聘妻劉

章瑤園女

戴可恆妻朱

金福曾妻李

張 麟 經 妻 姚

邵順年妻伊

邵 順 年 弟 題 國 妻

陳某聘妻鄧

胡金題妻俞

王 氏 女

鄭德高妻阮

方 其 遠 妻 阮

周小梅妻湯

楊某妻沈

周世棣妻胡

蔡以瑩妻曹

黃 馬

王永喜妻盧

劉崇鼎母張

武昌女子

淮 州 女 子

費某妻吳

冷煜瀛妻盧

陳 亮 吉 妻 俞

蔡法度妻簡

張守一女

王 占 元 妻 楊 王 慶 聖 女 魏 克 明 女

劉慶耀妻廖

廖敬維元妻等

黃氏女

周氏女

韓肖朱妻郝

張體仁妻王

許氏女

楊某妻吳

康創業妻邱

王李富貴谷

王有周妻楊

李氏子漢科妻李張元

張金鑄妻段

王氏二女

馬安娃妻趙

王之綱妻李

穆氏女

張某妻蔡

陳氏丁兒妻黃

趙貴賜妻任

楊貴陳妻劉

多寶妻宗室氏

郭子卓爾氏

公額布妻

普得布女

良奎妻

連惠妻

張瑞寶

松文母吳

姚叶敏妻耿

陳某妻殷

黃晞妻周

鄒延玠妻吳

陳生輝妻侯

田一朋妻劉

蔣世珍妻劉

王有章妻羅

有章妹

樓文貴妻盧

沙木哈妻

鄭榮組妻徐

張翼妻戴

詹允迪妻吳

蔡以位妻孫

楊春芳妻王

王竹園妻

竇鴻妾郝

章學閔妻董

杜聶齊妻何

聶氏婦

甯化二婦

章守官妻梁長清人明季饑女未行從父流轉河南婢於富室及笄主爲擇婿梁泣言幼嘗受章氏聘死不敢別嫁主使求得守官守官迎以歸已而守官卒家人欲使別嫁梁自沉大清河救不死乃自治棺曰有欲娶我以此畀之家人不復言寇亂匿棺以免順治二年師南行過其村梁懼積薪於戶下舉火乃入棺自焚死

歸昭妻陸弟繼登妻張昭崑山人陸張皆太倉人昭仕明爲監紀順治二年死揚州繼登爲教諭長興民亂戕焉二婦未得問崑山兵起舅姑避于鄉舟迎二

婦二婦不果行師至城閉城西礮如雷二婦夜登樓環坐諸兒女酌酒戒積薪樓下城破則縱火一老僕進謂城破當兵衝慮不及死城北比邱尼故與主母善菴後有池倉卒可得死從之城破兵掠菴張入池陸視其女一卒前犯陸力拒被二矛仆又亂鎗之乃絕張以水淺不卽死兵去潛視陸陸亦蘇乃與尼共掖起之兵復至張輒避諸池一卒索得張欲執以去張力拒見殺陸創重卒羅仁美妻李仁美揚州人失其縣李龍游人家揚州廣儲門師下揚州李方娠積薪所居樓下呼諸婦曰願死者共死毋辱於是姒劉仁美妾梅李前室女官姑及諸婦從李登樓凡十二人呼婢菊花舉火前室子哭從李俱上李願見啓牖呼仁美擲兒下仁美負母手挈兒哭出巷回首見黑烟出瓦隙火合樓摧聞隱聲沸火中仁美行遇兵僅得脫兵去發樓燼拾殘帋惟菊花遺肢衣可辨乃護葬十三人西華門外同時錢應式女淑賢丹徒人聞城破數自殺未絕兩其門外萬馬聲比屋殺人火四起淑賢以紙漬水塞口鼻持父手壅其氣父手悸不能舉又解衣帶強母使縊母哭走出聞足擊牀閣閣入視已絕

王氏三女金壇人其二爲同產其一爲羣從姊妹年皆十六七以往師下江南諸州縣盜群起王氏避長蕩湖晝延緣葦間夜復其居一日盜至刦三女子縛置筏上三女子號泣跌蕩筏覆三女子死焉賊十數輩亦溺明日尸浮水上縛盡弛三女子攜手髮相縻亂中無棺得故篋三重以斂墓于湖濱墓木枝葉皆三相樛

沈華區妻潘海寧人居硤石順治二年六月舉人周宗彝起兵硤石八月望師宵乘北關破之華區與潘皆被俘過南市橋潘睨水欲自沉華區密止之曰汝死兵且殺我潘乃語兵我從汝去願得釋我夫兵釋華區驅潘入舟舟行十八里至王店水次觀者方集潘忽躍起曰我硤石沈華區妻義不任受辱奮入水兵驚摔其髮出水潘力自沉髮斷繫以繯益力自沉纏絕如是三兵以刃舂其喉遂死師中有裨將歎其烈出千錢爲斂

陳某妻伍華亭人師下松江陳家璜溪兵至斧陳首伍奔救兵舍其夫而繫之伍曰毋縛我我從汝去將登舟躍入溪死當時死于溪者諸生孫謬妻顧徽州

商係氏之媼

洪志達妻葉歆人順治二年徽州初定盜賊所在多有志達偕葉避兵淳安鄭家村明年二月村人譁言兵至志達與葉倉皇走匿草中游騎過自草中曳葉出志達習拳勇有力踴自草中奮擊一騎仆衆騎拔刀赴志達志達徒手與鬥衆騎且仆且起環射之矢中志達目貫腦死葉抱尸慟衆騎挾之行葉輟哭馬行漸緩度懸崖葉曰勿持我急我自能乘賊信之遂縱馬向崖衆騎自後從之葉自馬上擲崖下死淳安人言其死且爲神爲之祠焉

羅章袞妻杜羣聘妻田淳化人羣聘章袞從子也皆早卒順治三年寇至城破杜指牆間井語養女淑明淑儀曰此吾曹死所也遂入井淑明淑儀相向哭從之下田與杜連牆居聞哭呼其女優姐亦趨井死先一年縣兵譟變章袞姪女寶芳墮樓死寶芳有從姊雁珠明崇禎間死寇寶芳方在娠其母夢雁珠偕一女至謂唐奉天寶烈女也故命曰寶芳既長嫁三原房大猷其死後雁珠十七年俱以正月十五日死死時年俱十八鄉人合前後稱七烈

王磐千妻顏江西安福人順治三年遇寇紆其臂索賄顏訖曰此手乃爲賊執耶投水死何大封妻阮無爲人早寡有授物誤觸其手者引刀斷指血濺尺許方希文妻項名淑美淳安人順治三年明潰師掠縣希文携家避兵西坑以妾子病謁醫兵驟至縱火火將及婢請項出避項曰出死于兵不出死于火死同死火不辱若能死則從不能亟出希文故有藏書項積書左右坐其中火及書燼項殉焉

廖愈達妻李妾汪張泰寧人李讀書通大義教二妾章句愈達從外歸聞李疏仁字教二妾語諄諄愈達入而笑李正色曰志士仁人有殺身以成仁毋求生以害仁順治三年愈達將妻妾避兵或傳崇禎十七年京師破時簡討汪偉與其妻耿殉國事李以告二妾相持而哭師漸逼愈達與妻妾夜走南石砦師至攻砦愈達率妻妾避砦口或呼師自砦後入李即從砦口展手投崖下愈達挈二妾匿巖石中搜山兵至張亦投崖死愈達出金遺兵去汪堅持愈達衣伏其後頃之遙見師中出裨將朱纓窄袖指揮從卒巡山汪大哭曰君善自保亦投

崖激于石身裂若支解師退愈達及諸同避砦中者皆得脫葉芊妻謝寧都人六年冬十月明將揭重熙等以師赴南昌駐寧都兵掠得謝部曲將悅其色問家世謝從容具以對因乞得沐浴部曲將許之遂入室以鬚鬢刀自搯其喉死姚文璠妻劉名滿福清人文璠鬻香于市順治三年海寇至索錢無所得截文璠首去滿昇尸還舐血縛布綴於頸歛畢乃言曰我恨不能手刃賊獨以死報君首觸棺仆久之甦請以兄公子爲後盡鬻衣珥營葬越三年清明上冢歸舁金咽之死毛翼順妻陳亦福清人順治四年翼順死于寇昇尸還血溢于鼻陳舐血歛畢不食七日自經

王三接妻黃曹縣人三接官汾西知縣黃侍姑田家居順治五年李化鯨亂破城姑婦皆被執黃語賊曰釋我姑我與金帛惟爾欲賊釋其姑黃度姑行遠乃罵曰吾家清白吏安有厚藏吾名家女命婦豈肯從賊有死而已賊磔之當時爲賊殺者劉琰妻邢等九人投水死者王躋聖妻韓等七人

程顯妻朱新建人明宗女也以其姪爲子婦順治五年金聲桓爲亂顯自南昌

將家人入山道遇兵相失或傳顯已死朱謂子婦翁死吾不獨生汝奈何婦曰死耳朱縊樹上已絕兵救之甦復觸樹死婦亦起觸樹兵前持婦婦齧其指奪刀自剄死劉元鐘妻吳妾朱南昌人元鐘亦將家人避兵兵及棄抱中兒道旁廁而走吳伏溝草朱爲兵得繫以行經溪躍繫絕兵斫其頰死吳出草行數十武遇鄰媼脫簪求扶持兵復至吳握髮仰天號曰夫邪子邪吾其死邪兵挾刃逐之行赴陂死是役諸女婦死者至衆靖安舒調熙妻朱救夫豐城熊嗣蕃妻胡及從子有恆妻沈從夫救舅皆死而新建徐文瑤妻朱割乳斷首進賢胡永益妻胡刃出背死尤烈

應氏婦鄆人貧行乞順治六年海寇至匿郭東廟寇欲汙之堅不從旣仍僞諾出廟將入井寇復牽以入終號泣不就死亂刃

平陽婦不知其姓氏順治七年姜壤亂爲其徒所掠過定州唐城村刺血題詩于壁並爲序自述略言明月在天清水在旁得自盡于此上不媿父母次不慚婿庶幾與水同清與月同明遂自經死

殷壯猷妻李豐潤人順治中壯猷爲臨藍參將十一年孫可望攻臨藍壯猷築城以守圍久不解出戰死李以印畀次子質揮使出避而與長子文自刎死楊昌文妻袁安義人或曰建昌人順治間兵亂父母迎袁歸袁不可曰棄姑避兵不義兵至伏地請死斫數刃去家人歸努目問姑無恙乎曰無恙乃瞑謹日昇妻陳高安人順治間金聲桓亂爲兵掠挾上馬力拒中八刃剖心斷脰刳孕死陳某妻萬萬縣人康熙間譚宏亂被執殺其懷中子萬詭言家有藏鏹賊使其徒從以往過懸崖奮起擠賊墮亦自投死

林應雒妻莫梁學謙女吳師讓妻某黃某妻李皆新會人應雒學謙師讓皆諸生順治十一年明將李定國攻新會城守閱八月食盡殺人馬爲食莫代姑梁女年十一代父黃李代夫皆死李之死兵持首還其夫使壟焉

文秉世妻梁鬱林人李定國掠州梁爲兵掠迫上馬梁哭據地罵兵殺之越二日秉世得其尸目未瞑也文氏女兆祥文樞妻陸灌陽人定國兵至姑嫂避火星山箐中兵入自殺何氏女昭平人是歲師遂定國避兵思庇冲或迫之死王

氏三女長亥娘次竹姑次酉娘博白農家女康熙十九年避寇宴石巖寇攻巖姊妹皆投崖死

陳心俊妻馬伏羌人年十九寡順治初流寇據城其渠聞馬有色遣人強致之馬居樓上揮雜器物擲樓下厲聲叱其人曰白若渠欲強污我惟有頭可斷耳渠聞亦愕曰烈婦烈婦卒得免郭俊清女蓮姑巴州人嘉慶二年九月教匪破城掠以去女罵不絕賊褫其衣罵愈厲殺之書其背曰烈女尸張問行妻楊秦州人同治間回亂破其堡楊遣三子行持厨刀倚扉罵賊賊斃其口至耳際罵猶不已遂死賊舉扉掩其尸書其上曰此張監生妻楊烈婦母損其尸

張聯標妾傅秦順人聯標爲羅陽知縣傅從年方笄山寇破縣被執賊渠令其徒百方誘之不從一夕擁至渠所諸賊執刀夾左右怵以死終不屈乃縊殺之林乾妻程漳浦人有殊色康熙元年縣有劉暢者爲盜馬婆山掠程至將污之不從使佗婦慧之曰我曹已至此卽完節誰復能信程曰吾自行吾志非求人信豈能效汝曹無恥耶暢殺之

楊應鶚妾修奉天人應鶚官貴陽同知吳三桂叛檄署官應鶚力拒乃置諸順寧師將入滇郭壯圖使殺之應鶚罵使者修曰大丈夫當毅然引決無戀戀如兒女子我請爲公先不使公遺憾遂縊應鶚亦縊

黃居中妻吳居中失其里貫吳豐順人廣東饒平鎮總兵六奇女也康熙中居中爲蒼梧教諭十三年孫延齡叛梧州戍兵應之入其室吳曰封疆之事固知非若曹所能若曹其俘我乎我將待之舊擊殺二人自伏劍死

胡守謙妻黃閩人守謙武舉當耿精忠叛守謙投書城外言賊必敗狀爲守者所收送郊外殺之黃請代不許乃求得守謙首綴於尸葬畢自具棺衾飲藥死沈棠妻俞莆田人年十八美耿精忠兵至執俞並及棠俞計脫棠乃抗賊賊威以刃就刃迫以火赴火幽之遂自縊賊磔其尸同時福清陳得棟妻蔣陳雲元妻周皆爲賊磔莆田林振先妻鄭支解永安黃尾四妻鄭刳孕貴溪傅護妻薛剖腹臟腑盡出

汪二蛟母徐妻戴開化人康熙十三年耿精忠兵入浙江境開化陷二蛟及母

妻行避賊賊至縛二蛟驅其母妻以行行過大澤戴厲聲曰得死所矣徐應曰待我賊持戴袖戴絕袖抱子自投澤中徐與俱下二蛟大呼縛盡絕亦赴水死後二年開化復陷劉章壽妻徐爲賊渠所得置樓上令兩卒爲守婦陽謂守者事已至此幸語若主欲婚我當具禮卒告渠渠盛服佩刀上婦迎坐解刀置案上復陽言奈何不爲我具衣飾渠諾而下婦取刀弄之拔出鞘忽引自刺守者前奪刀婦揮刀斷其臂遂自刎渠裂其尸

黃嘉文妻蔡名慧奴黃巖人康熙十三年耿精忠之徒陷黃巖明年師復黃巖以黃巖民嘗麗賊俘焉蔡及其子女屬杭州駐防將將黠蔡欲以爲子婦九月壬申將召蔡喻指蔡取壁間刀自刎死將投其尸於江時軍中得俘輒責金贖嘉文方求金杭州至則蔡已死乃贖子女還蔡父行求蔡尸十二月丙子風作江湖涌蔡尸乃出距蔡死九十有九日嘉文還言子女得贖止同日

徐明英妻吳名宗愛字絳雪永康人宗愛幼慧九歲通音律十餘歲即能詩善寫生間作設色山水明英卒康熙十三年耿精忠將徐尙朝攻處州略金華六

月游兵至永康尙朝營官浙東聞宗愛才色乃使脅宗愛族人求宗愛勢洶洶宗愛乃曰未亡人終一死耳行矣復何言賊遣迎宗愛以兩騎翼宗愛行至三十里坑宗愛給騎取飲投崖死宗愛二女兄皆能詩而宗愛尤工所著詩二卷長清嶺烈婦不知其氏諸暨人康熙十三年盜朱德甫占縣紫園山爲亂吏發兵討之婦見掠與其子併繫婦好謂兵吾既被獲復何言吾夫祇此子請俟其追至以子歸之吾從汝去耳行至長清嶺其夫奔而至婦復請以子授其夫度父子行已遠自擲崖下死

韓昌有妻李秦州人康熙十四年六月遇寇李負幼子行遇爲賊及李批賊頰罵賊刃之七創項未殊昌有昇之歸夜而蘇謂昌有曰必葬我松下又七日乃絕昌有葬之松下

馬雄鎮妻李雄鎮自有傳李不知其里貫雄鎮爲廣西巡撫孫延齡反遣子世濟如京師告變旋見執幽四歲康熙十六年吳世琮攻殺延齡遂戕雄鎮及其二子李及妾顧劉女子子二世濟妻董妾苗同日死雄鎮初見執置其孥別室

妾趙及世濟子一女三皆以飢寒死於是雄鎮二女相要同死妾願亦願從及雄鎮見執守者梯垣以告二女謂願今日當踐約爲椁于梁語願曰夫人諸母行宜位於中雖顛沛不可失序願曰我妾也又無出何敢與諸母齒再讓乃先縊幼女年十五弱手不勝縊久之環不就呼曰姊助我長女年十八應曰妹怖死耶吾助妹已皆縊董先二女縊縊再絕再仆地傷額及足三縊乃絕苗與劉後二女縊李視諸人皆死曰姑婦子女皆幸不辱身我無憾矣乃亦縊雄鎮自有傳願名荃字芬若豐潤人能詩畫

沈瑞妻鄭瑞附見其從祖志祥傳鄭父斌事鄭錦私署禮官蓋亦錦族瑞嗣封續順公駐潮州錦兵破潮州送瑞臺灣時瑞年十五斌蓋以此時婿瑞居數年錦部有傳爲霖者謀爲反間事洩辭連瑞錦繫瑞及其孥而以鄭歸斌鄭泣謂斌曰兒既歸沈氏生死與共請遣兒同繫斌使處于別室及瑞將死問夫人安在或以告解帶使訣鄭鄭遂自經傳璇妻黃名棄娘臺灣人璇爲霖子也爲霖事敗錦俘其孥棄娘有兄銓爲營救得免爲霖璇皆被殺棄娘矢殉銓寬譬之

棄娘曰今日之事子爲父死妻爲夫死復何言卒自經

劉岷妻張保寧人岷死烏蒙之難語在忠義傳岷旣死賊遂破城張冠帔坐中堂呼女易璋可璋及妾吳戒母辱出岷佩刀示易璋易璋泣而跪張斫其肩死可璋亦跪張慄刀墮可璋曰母怖耶拾刀自鑿亦死張語吳汝將三歲兒好自匿存張氏後吳號抱張膝張且歎且迴刀自殊頸且斷危坐几上吳揮乳母抱兒速去拜張前引刀衝喉死几下雍正八年八月事也乳母逃山中卒全張氏後師定烏蒙錄岷死事張吳易璋可璋旌贈如例楊天階妻關開化人天階爲烏蒙守備城破時戰死亦有女子子二長曰鳳次無名關聞天階死謂二女曰我當死汝姊妹宜求自脫二女泣曰父已死兄不知存亡何以爲生遂對縊關自剄死

烏蒙女不知姓氏里居烏蒙猱亂掠子女財物女子年少者頭人自取之女與其曹二十餘輩立棚下日暮頭人持刀入叱諸女去衣不從擊以刀脊次及女女年十五六有容色堅不從頭人欲擊輒復止小猱告有以酒食賀者頭人擲

刀出裸營中爲坑爇薪炭禦寒女挾頭人所棄刀立坑後頭人醉復入就女張兩手將抱持女迎刺洞其胸仆地死衆裸驚就視女已自剄羣碎其尸

劉亨基女字滿湘潭人亨基官臺灣府同知權知彰化縣林爽文之難亨基殉焉滿年十六自沉廳後池池淺不得死展轉泥中賊大至曳之上滿罵曰我名家女豈懼死乎汝曹生太平乃爲逆亂官軍至汝曹當萬段賊割其口刺其鼻罵愈厲乃殺之臺灣平得旌臺灣之民私諡曰貞烈

滕士學妻滿向宗榜妻滕滕作賢妻楊滕家萬妻黃皆麻陽高村人乾隆六十年苗亂掠高村入士學家擊滿以梃滿怒罵苗挾其目罵愈厲遂斷舌剖腹寸磔死滕縋其兒走水次求舟將渡苗逐之執其手滕怒罵苗殺其子滕躍入水死作賢家萬皆爲苗殺楊自剄殉黃爲苗掠至八斗山給苗入深林解刀提其胸殺之走求家萬尸巖下亦自經殉高村又有婦以舅方病不忍去苗至將殺其舅婦奪刀刺苗殪遂自剄

陳世章妻朱義寧人世章爲湖北保康知縣嘉慶元年曾世興爲亂保康故無

城賊驟至朱懷印坐賊挾刀索印朱曰我命婦印在此汝曹何敢奪賊以矛貫其胸死

薛中傑女洋縣人嘉慶二年教匪掠縣境女年十六七從家人行避賊爲賊得置馬上女罵躍仆地賊掖之起行經益水濱自擲入水方冬水落不即死賊岸上立好語招使上女益匍匐求深處賊攢矛刺之死傅瑛妻周寶慶人道光間教匪起周方在母家從母置叢粟中賊擁入鄰婦先匿者羣叩頭乞哀周語母曰死生命也奈何降志於此曹乎乃舉袂蒙其首伏母懷賊迫視之美挾上馬二賊挾以行周罵賊賊撫其背爲好語周以指斨面罵益急賊刺其脅推墜馬死亂刃下

任泰邨二十烈女任泰邨寶豐縣村也嘉慶五年教匪至距村不十里村民出禦此二十人者與同村諸婦避於樓教匪入村攻樓不能克乃收禾黍積樓下環而焚焉火熾樓中諸婦有穴牆而跳者或欲與二十人俱二十人同聲曰教匪盈野理難自拔萬一求死不能得何顏食息于人世死于刃死于水死于火

死同也惟畢命於此吾儕志決矣俄而風起火益怒樓燼二十人燬二十人中已適人者何李氏任張王氏劉王氏馮劉氏傅李氏任趙氏任周氏任宋氏任邱氏任張氏任趙氏趙葉氏李張氏張趙氏崔郝氏未字者何氏馮氏傅氏熊氏崔氏

王自正妻馬秦安人嘉慶五年教匪破縣馬被掠罵不已刀脅之益厲皆裂血賊積薪焚殺之

強逢泰妻徐韓城人逢泰父克捷嘉慶間官滑縣知縣十八年九月庚午李文成之徒爲亂克捷及其妻殉焉前一月逢泰將其弟望泰歸取婦亂作徐罵賊不爲屈賊繫徐釘著聽事柱上櫟割之棄其骨事聞仁宗以徐死事烈命諡節烈贈恭人附祀克捷祠方振聲妻張大興人陳玉威妻唐臺灣人振聲官嘉義縣斗六門縣丞玉威官臺灣北路協把總道光十二年十一月盜張炳爲亂遣其徒黃城攻斗六門振聲玉威與千總唐步衢拒戰皆死之張唐殉焉張罵賊則鼻剉舌死尤慘其幼女亦從死宣宗命張唐並諡節烈附祀振聲玉威祠終

清世婦人得諡者凡三人克捷振聲玉威語在忠義傳

寶豐二婦不知其氏縣察河寨人道光中教匪爲亂官軍逐捕以車載火藥留置寨中爲教匪所調將擄而有之攻寨急墮其一隅爲陂陀肉薄以登二婦見賊入大呼曰寨破矣火藥且資賊奈何寨中人皆潛避無應者二婦從風而火藥盡焚煙涌塵起蓬勃擘晦如夜賊自相鬪殺二婦燔焉

戴鈞衡妻李妾劉桐城人鈞衡文苑有傳咸豐初洪秀全之徒攻縣鈞衡避舒城李劉及二女居寇至仲女年十六抗刃死李劉皆被掠寇使他所掠婦與李處李陽與諸婦語納手入袖忽口噴血仆地視之刃刺喉死寇欲褫其衣其侶呼曰此烈婦汝褫其衣吾斬汝諸婦防劉益嚴劉受李誠以間脫其幼女囚兩月餘不言不櫛髮一日寇欲汚之乃大罵寇怒殺諸東郊外罵不絕曰吾今可以報女君矣遂死

陳吉麟妻周臨川人咸豐間洪秀全之徒破縣周與女仙英走銅嶺賊及之加劍于項逼之不肯從殺仙英愈怒批賊頰賊殺之尸提其首而立賊爲之驚走

同時凌傳經妻楊彭澤人與姑匿山中賊搜得姑楊持刀奔赴賊舍姑與鬪力盡爲賊支解楊同縣又有賈蓮品妻韓擢賊爲所磔

秦耀曾妻畢耀曾江寧人畢鎮洋人湖廣總督沅女也耀曾以舉人官郎中咸豐三年二月洪秀全攻江寧畢年將八十城破集家人告曰吾家人受朝廷恩於義當死爾曹皆朝廷百姓平日受承平之福今寇亂可愛死乎且爲賊得必有求死不得者悔何及乃服命服扶杖赴水死從者數十人曹士鶴妻管名懷珠字藏貞亦江寧人士鶴官陝西清澗知縣城將破與士鶴兄妻李縉朱氏祠樹上自書衣襟曰陝西清澗縣知縣曹士鶴妻管氏爲國死於此

謝石全妻廖曾石泰妻黃葉金題母胡繆勝雲妻黃皆定南人咸豐六年粵賊攻城廖黃皆助城守廖執刃登陴歷數十晝夜一夕依堞視賊爲飛礮所中遂卒黃佐石泰殺賊賊攻城東南隅黃赴救中火鎗猶大呼殺賊死城上八年賊復至攻胡所居村金題從鄉兵禦賊胡捫析薪斧踣賊十餘力鬪被重創與金題俱死勝雲所居曰繆家莊土寇作黃與如姪發火箭燬賊賊踰屋入勝雲與

其父皆死黃揮刀巷戰久之賊大至自剄死

石時稔聘妻劉名敏和吳縣人家洞庭山時稔卒劉得請於父母奔喪奉姑居咸豐十年夏洪秀全之徒破蘇州洞庭山民拒守閱歲餘力盡賊自山前入劉盛服待水次誓死居三日賊不至姑挽令入室劉問何以得免則曰率錢輸賊兵劉躍起哭曰是乃降也降則此賊土吾賊人矣吾以爲三日中若輩與賊決死戰耳今若此何用生爲姑與家人輩力勸毋死劉好謂曰我三日不入戶慙矣且少休入室即夜自經死留一紙自書生死年月日

章瑤圃女亥姑餘杭人咸豐十年年十五六月庚午賊至亥姑抱柱堅不釋賊擊之十指皆創抱柱如故賊斫其肩背亥姑罵曰恨不爲男子殺爾輩盡賊勒其頸死

戴可恆妻朱可恆仁和人朱長興人可恆父熙自有傳咸豐十年杭州破熙殉朱具衣衾視歛如禮從可恆轉徙明年復還賊復至圍急朱方爲詩詞自若曰我自爲計久矣何懼城破朱語可恆速將子山避賦詩矢死不食兩日未絕自

經絕斷又未絕夜入池死即熙死節處熙死時少子穗孫妻孫方歸省聞即仰藥殉其祖母姚母閔及諸弟妹皆死凡七人

金福曾妻李福曾秀水人有傳李餘杭人福曾父鼎燮官臨安訓導寄拏杭州洪秀全之徒再攻杭州圍久食盡雜啖草木甚至燂兩屨緣革爲食城將破李與福曾矢必死尙餘銀餅一爲福曾縫置複絮中謂窮途得此猶可旦夕活也俄賊大至投姻家洪氏屋後池死同時鼎燮殉臨安鼎燮弟鴻信妻胡避臨安村間爲賊所迫矛舂其喉死十年賊破嘉興福曾之族諸婦女死者衍芹妻倪衍科妻鍾鴻鑑妻徐鴻墀妻許鴻勛妻潘鴻勛妻胡鴻綬妻顧鴻紱妻屈徐許皆有女從死振聲妻張賊將至時先自經殉張福海妻姚錢塘人福海官廣東曲江知縣姚家居寇至城圍合米盡食麥麥盡食糠粃糠粃盡食馬料豆城破賊脅姚行姚奮起擊賊被殺同死者娣姒孫王女杏珠姪女滿文月邵順年妻伊仁和人順年懿辰子懿辰自有傳杭州被圍伊炊粥奉舅姑輒忍飢不食城破俟其姑既出入井死巡撫馬新貽上懿辰死事狀附陳伊生則以

孝事親臨難不求苟活深明大義得旌順年弟順國妻劉亦仁和人順國爲六合知縣卒劉父塋方爲漢中知府令以二子往劉謂異鄉非可久居以順國喪還葬蒐光世藏書授二子督就學甚嚴二子皆成立

陳某聘妻鄧海甯長安鎮人未行而夫死誓不家奉父父卒爲立後年四十餘賊至焚其村鄧自沉水甕中賊去賊族往視之其廬燼甕水沸尸爲糜矣

胡金題妻俞金題烏程人俞歸安人家雙林賊以有色驅使行不從持刃嚇之張目以頸就刃賊笑曰癡女子乃繫以行行數十步有橋橫水俞好語賊曰兩後泥滓繫不可以行乞捨我我自從汝去復請以兩矛夾持以上示無死意至橋半奮躍入水賊怒其紿矛刺之死王氏女婉容亦家雙林賊掠其父母婉容請于賊釋父母我從汝去賊釋其父母已入舟婉容出戶呼曰我猶有語請少待且呼且行近水疾躍自沉賊操矛拯之不上遂死

鄭德高妻與方其蓮妻皆阮氏兄弟也蘭谿人賊破縣德高其蓮將其孥避北山久之德高其蓮偕入縣爲賊殺二婦慟誓死一日賊奄至二婦堅坐不爲動

一賊持矛入倚矛於壁呼二婦具茗二婦不應賊解佩刀擲地曰不應且死二婦厲聲答曰我曹畏死尙坐待汝耶吾夫死于賊今當殺汝遂躍起卽取刀矛擊賊賊徒手被數創大呼羣賊皆至二婦力鬪死

周小梅妻湯名碩人常熟人咸豐十年洪秀全之徒陷常熟小梅方赴鄉湯率子漣香女淑貞及幼子女入井死將入井屬長子於隣翁脫戒指付老僕屬持書報小梅書曰昨君出門飯後卽失常熟一夜未眠今水窮山盡當死義恨不能一言爲別願君平安勿以妾母子爲念寄戒指一枚見此如見妾

楊某妻沈名彩霞金華人生農家有力能舞大刀重百斤俗鬪牛牛奔彩霞手挽之牛不得動咸豐十一年賊將至鄉人集團練得數百人推彩霞主之時蘭溪諸葛蕪團練過萬人與相犄角賊至則互救洪秀全將李世賢自龍游至彩霞乘其未定擊之敗走總督張玉良兵至蘭溪暴於民蕪甚之兵有自賊降者僞爲諸葛氏之轍過金華索犒彩霞察其詐擊殺數百人玉良告巡撫謂團練殺官軍互訐不已賊又至僞爲官軍裝更不復察金華破彩霞自劉死楊某亦

死亂軍中

周世棟妻胡鎮海人咸豐十一年賊掠世棟去使市馬以三賊監之行世棟曰吾鄉故多馬四人乃不足賊令募壯夫偕世棟得鄉人同陷賊者六導之至鄧東鄉地僻遂手刃三賊其一實陽死世棟未察也遣鄉人自歸矯賊令入寧波出被掠男婦數十輩夜半陽死賊歸告其渠將羣賊捕世棟世棟逃走賊執世棟母及胡胡語賊曰吾家有藏鏹請以吾質遣吾姑發藏鏹償諸公姑已去胡仰藥死世棟母子皆得免

蔡以瑩妻曹妾馬蕭山人咸豐十一年賊自嚴州循江薄蕭山以瑩將妻妾子女避兵王家橋遇賊刦曹將犯之且罵且入水死子景軾女景良奔赴與俱死女景李爲賊掠語賊勿相強我固願從汝賊稍寬之行近水亦疾躍自沉馬抱三歲子匿葦間以瑩還求得馬賊復至馬視道旁舍有采菱者所遺木罌折枯木授以瑩使乘以渡以瑩要馬偕馬曰此非舟不能勝二人出懷中兒投以瑩曰以此子隨君去以瑩渡未半廻望賊垂及馬呼君勿念我今與君永別赴水

死以瑩得免

王永喜妻盧永喜開州人盧清豐人咸豐十一年四月乙巳盜李古考圍州城永喜將出助守語盧曰若聞礮即城破吾家世清白慎勿爲賊汙盧曰諾賊至舉礮相擊城得全永喜歸則盧率二女自經死矣二女長曰印次曰改又有張氏婦村居賊執以去見井給曰我渴甚乞解縛飲我賊解縛入井死

劉崇鼎母張都昌人咸豐間洪秀全之徒攻縣縣人治鄉兵推崇鼎主其事崇鼎謝母在張曰人誰無母皆以母謝誰當殺賊者崇鼎受命主鄉兵張出家財佐饗賊至崇鼎請母避賊張泣然曰未戰而先策敗人心散矣有進尺無退寸此外復何顧崇鼎雪涕出戰敗死張聞敗曰崇鼎死矣遂自經未絕賊已入張出坐堂上罵賊死之

武昌女子不知其姓氏在賊中號爲朱九妹咸豐間洪秀全破武昌驅以東至江甯楊秀清欲納之女侍飲醺甚潛置毒酒食中進秀清持之急秀清察有異磔死滄州女子亦不知其姓氏同治七年張總愚北攻滄州其黨得此女獻總

愚總愚使執役女袖出剪刺總愚傷其臂羣賊集立醢之

費某妻吳費某德清人吳處州人失其縣父景藩爲湖州運糧千總因以女歸費早寡事祖姑甚謹洪秀全之徒陷德清景藩他徙吳屬以子而留事祖姑賊大至追吳將汙之不從賊抽刃出祖姑與相向哭吳慷慨求死賊繫之樹上曰我出汝心觀汝心堅否刃刎胸出心堅如石賊大驚就德清人求其姓氏曰此婦殆有神

冷煜瀛妻盧義寧人煜瀛官都昌訓導洪秀全之徒破縣死之盧伏哭煜瀛側爲煜瀛理鬚厲聲罵賊賊斷其舌死手猶握鬚弗釋也陳兆吉妻余亦義寧人義寧破賊殺兆吉余方姪罵賊賊刎其腹兒逐刃墮呱呱泣賊驚走其渠聞爲之少戢

蔡法度妻簡新淦人簡早寡美洪秀全之徒攻縣名索簡言不得屠蔡氏蔡氏大恟簡曰是無難艷服乘輿出方度谿橋驟自輿躍出入溪水溪水急求其尸勿能得

張守一女春英山西人寓海城同治二年回亂守一已卒弟妹幼母悲泣春英陽語回能脫我母及弟妹願相從回遣兩騎使守一舊僕護之行春英度去遠入井死王占元妻楊皋蘭人同治四年回亂楊從家人匿山穴中爲回所得楊曰如愛我幸毋傷我姑回驅楊去至一村回入掠楊語途人曰我王占元妻將死於此乞寄語吾夫速負母遠遁遂入井死王秉堃女翠環固原人亦爲回得欲挾之去翠環曰釋我父兄可回釋其父兄曰我弱不任騎願以輿行回喜俾以輿行女輿中餌毒未至回所死輿中魏克明女秀蓮涇州人同治七年二月從兩兄行避兵回至次兄中矛死秀蓮跪請活長兄回許之長兄脫走至山麓遙望回迫秀蓮乘馬渡水至中流墜水死

劉慶耀妻廖龍南人慶耀昔酒自給同治三年賊至廖持刀衛姑出賊執姑廖揮刃斷賊腕姑得脫賊鬪廖殺二賊力盡刳腹斷舌死歐陽維元妻曹崇仁人姑早寡年九十九矣賊急曹奉姑走太浮山遇賊姑見殺曹與維元擊賊皆死李盤龍妻鄧永新人賊攻縣鄧與族姊姒走遇賊仕坪三婦共鬪賊皆死姊

姒失其氏

黃氏女名婉梨江甯人咸豐三年洪秀全破江甯婉梨方五歲有母與兄弟居同治四年師克江甯有兵入其室殺其母及其兄弟縛婉梨置舟中謂將歸湖南婉梨好語兵至汝家當妻汝舟中母相逼時有金眉姑者亦被掠自沉於江婉梨舉以怵兵兵不敢犯月餘將至其家驅就陸兵遇其侶與俱投逆旅二人方共飲婉梨見牖上有毒鼠藥潛置食中夜分一人毒發死一人毒淺未即死婉梨掣所佩刀刺其腹題詩壁間述始末自經死程氏女名季玉歸安人從父居蘇州蘇州陷其父以醫卜自活師克蘇州季玉與其父相失就鄰媼匿桃花塢其女兄爲部曲將所得脇季玉去季玉自經不死作絕命詩畀媼使他日告其父入井死

韓肖朱妻郝趙州人姑瞽張總愚自柏鄉向趙州郝奉姑走欒城賊驟至姑曰我瞽不能行汝可疾逃無以我累汝郝侍姑終不去賊見其少將繫以去郝請訣于姑賊稍緩郝急趨赴井賊持矛逐之郝張兩手以拒迴身墮井死賊去出

其尸矛創七

張體仁妻王武強人張總愚之徒入縣境王避亂深州賊至王與婦女數百自沉于漳沱水淺不即死賊據河濱村二日饑凍顛踣一婦哭曰此不即死不如死賊刃王曰見殺于賊辱甚不如水死三日僵立死同縣許氏女從其父避賊行遇賊女促父速去父陟岡望之賊授女鞭令上馬女持鞭鞭賊罵曰豎子安敢爾賊繫女挾刃迫之女罵如故刺其腕刺其肩罵如故遂見殺李氏女名蒲饒陽人亦從父避賊賊至將刦之去女抱持父坐于地不起父令從賊行道側有井父顧曰蒲井也蒲疾入井賊並擠其父入井同死

楊某妻吳武進人子傳第以舉人官知府客河道總督幕迎吳居黑塌黑塌在開封北濱河同治三年八月捻匪攻開封未下掠黑塌吳罵賊死傳第從河道總督在開封聞母死大戚以爲不能豫戒陷母死爲母撰行述成仰藥死

康創業妻與李鴻業妻皆邱氏兄弟也深澤人同治七年張總愚黨掠縣境方歸嘗從其父半千登屋避賊登刺半千死姊持梃擊賊妹奪賊刀殪之賊踵登

揮刀墮梯下斃賊發鎗妹仆姊被數十創亦死王書雲妻谷亦縣人書雲精針灸谷傳其術活婦女無算賊至矛刺其子鳳銜仆谷操杖擊賊曾賊縱火與其子鳳德鳳桐女然文皆死

王有周妻楊玉門人早寡撫三子漢連漢元漢科皆長同治三年正月回攻所居堡急楊使漢元問道詣肅州請兵漢連以其人出禦楊聞砲聲急急堡破將二女係入井死漢連妻張挈次女自經漢元妻李率次女飲酖漢科妻李及子三從女一女甥一皆自剄踰時回敗去漢連歸則家人皆狼籍死矣

張金鑄妻段平涼人同治間回亂金鑄跳而逸段未得從回至脅以刃不爲屈砍項折未殊猶怒罵復斷其左臂乃仆回委之去金鑄歸段尙能語曰我家長物盡爲寇掠去惟敝書數帙我取置懷中君可將去又曰我且死君當速行勿以我故留寇復至君將不免金鑄取懷中書欲去返顧段已絕

王氏二女香蘭纏娃秦州人同治八年回亂掠香蘭悅其色以好言誘不從刃脅不屈欲走投崖爲賊及支解死纏娃年十六尤麗賊繫以行纏娃唾賊面罵

不少怯亦見殺

馬安娃妻趙秦州人莊而有容回亂見執罵賊創口被數十創而死安娃母田兄妻趙皆死王之綱妻李亦秦州人扶姑避賊賊及之李捍賊刃乞代姑姑得間走李乃罵賊賊刎其左目被十餘刃而死

穆氏女名芝束鹿人幼慧同治七年年十八捻匪至欲繫以去女哀之不聽乃呼其父曰速去勿相顧兒自有以處之父行稍遠芝厲聲詬賊賊鞭之仆賊曰汝陽死豈捨汝耶就曳之芝驟舉足創賊目賊連刃刺之死

張某妻蔡秦安人同治中回亂蔡有色回使執饔不可與語兼嘲謔蔡奪他賊刀刺之傷賊手見殺同縣程丁兒妻黃執厨刀擊賊不中賊刎其腹引腸懸樹上張氏女小字純秀年十七有色爲回得堅繫之女止哭求弛縛度峭巖聳身自擲巖下死

趙貴賜妻任甘肅安化人同治間回亂貴賜爲團勇戰死回入其家任執厨刀伏戶側回先入者出不意斫之踣餘賊挺矛入任反刃自殺楊貴陞妻劉伏羌

人回執其姑將捶楚劉請代不聽取厨刀殲一賊因自殺

多寶聘妻宗室氏多寶赫舍里氏失其所隸旗宗室氏正藍旗人大學士靈桂
兄女未行多寶卒易衰絰赴弔立從子英煥爲後靈桂以聞穆宗書未吉完貞
四字以賜英煥亦早卒妻鄂卓爾氏蒙古正白旗人大學士榮慶女弟昏甫逾
月姑婦食貧守節光緒二十六年義和拳爲亂各國合軍入京師城破多寶弟
和寶妻率傭婦入井多寶妻起引藥飲其婦視既絕乃自飲同殉

公額布妻西安駐防失其所隸旗善事姑三十而寡教二子奎亮奎喜有禮法
宣統三年九月亂作戒二子曰此我完節時汝曹當努力報朝廷毋念我城破
率二子婦及孫定炎成惠孫女三入井死清中葉後八旗多從漢姓公額布妻
姓關桑氏奎亮妻關鄂氏奎喜妻關白氏音德布女雪雁西安駐防正紅旗人
幼慧粗解文字亂作從家人出避行遇兵有誘之者雪雁引刀斷其指血沾衣
誘者驚卻又遇兵強脅之女大詬曰吾頭可斷志不可奪兵羣起扶之無完膚
女罵不絕刃洞胸死之

良奎妻從漢姓曰石甘氏荊州駐防滿洲鑲黃旗人爲駐藏大臣鳳全女兒鳳全自有傳貧躬織紉供朝夕諸子佐軍迎母居武昌宣統三年八月武昌兵起諸子將奉母出避力拒曰吾七十老婦死何憾諸子哭麾之出遽闔戶翌日兵大掠與子婦二女子一係及女孫三皆死之

連惠妻從漢姓曰趙那氏京口駐防失其所隸旗連惠咸豐間以前鋒從攻鎮江戰死連惠妻以節旌宣統三年年已逾八十九月兵起出走兵抽刃擊之未殊罵不絕被數刃乃絕血肉狼籍白髮爲之赤根瑞妻從漢姓曰王劉氏京口駐防鑲白旗人父德永有文譽客授學子根瑞妻服父訓早寡以節旌無子有女已嫁依以居聞兵起語女及女夫曰吾年六十二被旌當殉變爾曹將子女村居得田十畝耕且食毋更求仕俄聞副都統載穆死官即求死輒救免號泣不食女及女夫跪進食終不食七日乃絕

松文母吳松文荊州駐防鑲藍旗人同治初徙江甯從漢姓爲馮氏吳荊州士人女也事姑孝早寡無子松文其族子也立爲後松文子富倫渾才而早卒松

文哭子慟亦卒松文妻康富倫渾妻石仍世守節宣統三年兵起江甯駐防軍潰松文母年九十三矣慟哭以仍世守節義不辱首觸牆死康與婦石將諸孫自沈于水康死石與子女遇救免康與石不詳其族系

姚叶敏妻耿襄城人叶敏早卒事舅姑盡禮立兄子爲後武漢兵起耿方病襄城土豪爲暴掠婦子爲質耿懼辱飲藥死

陳某妻殷秀水人宣統三年殷從夫在郴州九月長沙兵起湘南諸府州應之郴屬縣宜章永興皆變殷告夫誓相守以死夫趣殷將子女徙湘鄉依戚屬避兵殷不可強之乃行瀕行部署瑣雜事井井入舟抑鬱語子女若曹免矣若父奈何湘鄉距郴千餘里俄傳郴破殷憂悸不食面深墨戚屬相慰藉陽爲酬答十月壬子夕戚屬同居者聞啟戶聲旋聞其季女驚呼阿母起燭之就堂後門衡自罄死矣

黃晞妻周江陰人晞父毓祺明諸生能文明亡發狂亡命有司得晞繫諸獄周聞自經婢救之不死乃日餽獄餽粥夏不施帷恣蚊囓曰我遙與獄中共辛苦

也歸入獄十閱月事小解得出居無何怨家告毓祺所在死江甯按察使獄中有司籍其家捕歸兄弟兼收周周夜投水不死茹金屑亦不死乃詣府蔽刃刺喉血衝溢仆地知府驚其烈問歸有女兄爲女僧命舁置所居庵上按察使請釋周按察使不許下縣令再收周周創漸合乃自歸語縣役曰我不累若輩第徐之俟我死持片紙去公家事易了也手檢歸單衣一付老僕曰主人行久無衷衣備澣濯汝以此寄之徐入室闔戶自經乃死時順治七年十月丁巳年二十八歸尙繫按察使獄聞周死爲文述其事略言古成仁取義之士所以趨死之道不一由其一皆可得死婦獨多途徧歷靡苦不嘗而顛跌頓蹙卒死于家一以顯百折不回之苦節一以遂正命內寢之初心天不可謂無意云歸輸八旗爲官奴鄉人贖出之得歸爲童子師至七十餘乃卒

鄒延珩妻吳武進人延珩明諸生順治八年逮繫江甯獄十年見法吳自經救不死十二年延珩喪還葬十三年有司復議收延珩家北徙周乃迎母至夜將半起請母所曰兒今固必死安能俯首求旦夕活作長安爨囚婦耶願母稍忍

成兒死母泣不能言周更衣拜佛復向母曰兒欲爲母拜恐傷母心兒不敢母老矣勿以兒故過哀因出一扇曰此夫子南京寄我者出一囊曰有醫方夫子所手校有書夫子生平所習有髮夫子獄中所留也仍乞以殉復呼婢戒母號乃自燃燭持囊及扇還入室時鷄甫鳴母及婢傍徨哭不敢出聲少頃視周自經已絕死前一日苦熱周祝曰安所得甘雨乎遂雨竟日人謂節婦雨

陳生輝妻侯單縣人順治初盜掠生輝使牧馬縣北郭秦氏有馬爲盜掠生輝乘以歸秦氏見馬訟生輝坐通寇死侯事姑喪葬畢並葬生輝設祭自剄田一朋妻劉通江人國初一朋不從雉髮令坐當死吏並繫劉去劉挾毒自隨聞一朋將就刑先服毒死

蔣世珍妻劉揚州人失其縣世珍順治中爲廣東連平知州有惠於民嶺海初定土寇數發謀報旁縣賊數千人嚮連平行至世珍曰賊至驚吾民吾且往權順逆強弱而爲之所單騎入賊中諭其渠降其渠爲引退世珍宿賊營翌旦乃還守備吳章者故與世珍有隙誣世珍通寇告總兵黃應傑應傑啟平南王尙

可喜捕世珍赴惠州獄劉繫置守備解旁舍章將無禮於劉劉怒叱去又遣婢說劉劉曰死不可緩矣遂縊而死世珍入獄病亦死連平民葬劉州南烏石埭爲之碣曰正烈劉宜人之墓嘉慶二十三年知州陳鵬來上其事乃得旌

王有章妻羅益陽人順治七年盜殺有章父庶及家人男婦二十餘輩越三年又殺有章惟餘羅及有章妹頭貞皆斷髮撈而號於有司歷八年乃論殺盜渠羅謂頭貞曰我當報汝兄地下因不食死頭貞初字曹氏子曹氏子以其毀容也遂罷婚頭貞徙長沙仇家有子赴試誘至家殮之

樓文貴妻盧東陽人文貴農也有鵝啄其麥文貴驅鵝傷鄰兒鄰兒呼遂毆之投水死里豪喝文貴使鬻妻以爲解盧曰吾不忍生離文貴怵得罪因求死盧曰吾與汝同死遂入林偕縊

沙木哈妻哈里克滿洲鑲白旗人沙木哈兵也爲第三太所擊垂斃沙木哈妻誓身殉沙木哈言曰我止一弟我死弟抵罪守先墓撫諸孤復何人汝當言於官曲贊三太死沙木哈遂死沙木哈妻叩關述沙木哈遺言乞贊三太聖祖命

許之沙木哈妻得請卽自裁康熙三年正月壬午禮部疏請旌表聖祖令立石
家上書其事始末

鄭榮組妻徐西安人榮組有族叔無狀毆其父赴救爲所殺其子五元七元遇
仇於途嚙其鼻仇愬於縣縣吏逮五元七元徐以冤白吏吏不省撞縣門碑死
時康熙二十七年六月事也典史某爲具檣露置城西鐵塔越七年知縣陳鵬
年爲營葬立祠於墓側

張翼妻戴名禮烏程人翼父韜嘗知休寧縣託翼於其友王毅毅以女妻焉韜
卒毅女亦死繼室於戴毅子覬翼產康熙六十年五月誘至其家迫作券毆之
垂斃擠墮水昇歸不能語瞠視戴戴泣曰我一弱女子不能爲君復仇當以死
從君齧指以誓越七日翼死又十七日戴自經衣帶間得絕命詩三章

詹允迪妻吳東陽人允迪不睦於族人爲所中坐危法下獄吳期與俱死至其
日盡出金珠畀所識貧乏者散諸婢僕詣獄與允迪訣瞠視不語者久之歸自

蔡以位妻孫侯官人以位佐饒商與私販者鬪而死孫迎喪河干自擲入水以救免其姊卽其姊也責以撫孤乃不復言死官捕得私販者法當檢驗讞乃定孫曰是重慘吾夫也乃大感官悲其意爲杖殺私販者喪再期從容語其姊曰兒稍長履鞭可取諸市不煩手自製矣兒昔病瘍今愈矣不累我姊矣或曰姑在旣祥當更淺色履孫曰然姑徐之至大祥奠竟入戶自經死

楊春芳妻王銅梁人乾隆十七年其家火春芳臥病王入戶負以行火逼不能出子女奔赴皆死王尊德妾唐臨桂人尊德年八十病劇鄰家火唐欲負以避力不勝火迫尊德揮使出唐身翼蔽尊德皆死

竇鴻妾郝字湘娥保定人十六爲鴻妾能詩善弈畫兼工花草士女有繩其才者豪家謀奪之不能嫉盜誣鴻死湘娥因自經將死爲絕命詞矢爲厲以報章學閎妻董名合珠連江人故爲婢嫁學閎學閎貧不自聊走死深山中董號泣求之不知其在亡逾年有樵入山若有聲巍巍行見遺幣委於地雙履在側出以語人董聞曰得非吾夫乎亟往視履其手製也拾餘骨瘞焉卽夕自經死

杜茹齊妻何茹齊泰寧人何將樂人茹齊死於虎何求得尸解衣拭其血歛畢
斥家財以葬悉以其餘分戚族遂自經張氏婦宿州人夫樵於野遇狼爲所噬
婦求得夫尸以鏹絕脰死

寧化二婦不知其氏其一夫嗜博母閉諸室中不與飲食婦導使出亡既夫死
於途婦聞自殺其一夫行竊父將殺之婦泣爲請免生二子婦攜就母家父卒
殺其夫婦聞亦自殺